

四庫全書

經部

毛詩譜考證

周南召南譜文王受命疏以泰誓之篇伐紂時事已言
周公曰○尚書泰誓文無周公曰三字

其得聖人之化者謂之周南得賢人之化者謂之召南

○ 臣會汾

按楊龜山謂儀禮大合樂歌周南召南儀

禮之作正在周公之世則分二南在周公之時周公
豈以聖人自居而賢人待召公乎此論甚當

邶鄘衛譜以殷餘民封康叔於衛疏書序曰成王既伐

管叔蔡叔以殷餘民封康叔○

臣宗萬

按五峰胡氏

正書序之誤以為武王封康叔朱子從之康誥曰朕弟寡兄明是武王之言也

七世至頃侯疏子孝伯立○史記作考伯

又疏子建伯立○史記作康伯音提又世本作摯伯又疏子貞伯立○世本作箕伯

從其國本而異之為邶鄘衛之詩焉○

臣人龍

按朱子

以邶鄘衛為音之異後以為不可曉蓋闕疑之意顧

炎武曰邶鄘衛總名也不當分某篇為邶某篇為鄘
某篇為衛分為三者漢儒之誤非夫子之舊也考左
氏季札觀樂為之歌邶鄘衛曰是其衛風乎北宮文
子引衛詩曰威儀棣棣不可選也此詩今為邶之首
篇不曰邶而曰衛是知累言之則曰邶鄘衛專言之
則曰衛猶之言殷商言荆楚云爾其論甚當

王城譜其詩不能復雅故貶之○李光地曰平王初年
周太師猶舉舊職欲存風雅二體節南山以下作自

卿大夫者曰雅黍離以下畿內民俗曰風其稱風而與西周別者以此至晚歲乃並此而亡之先儒惑於詩亡之義乃以雅為西以風為東而有黍離降為國風之說夫王號猶在誰則降之耶

鄭譜駁蔽補丹依疇歷華。疇鄭語作哱華鄭語作莘武公又作卿士疏鄭人立公子儀。史記作公子嬰

齊譜爽鳩氏之墟。

臣光型

按漢書地理志曰周成王

時薄姑氏與四國作亂成王滅之以封師尚父顏師

古注武王封太公於齊初未得爽鳩之地成王以益之也

後五世哀公政衰疏子成公說立○史記作脫

又疏子莊公購立○世本作贖

魏譜在禹貢冀州雷首之北○臣光型按通典云雷首

凡有八名歷山首陽山薄山襄山甘泉山中條山渠

潞山獨頭山寰宇記云中條山在芮城縣北十五里

水經注云魏國故城西南並距河二十餘里北距首

山十餘里是魏國在雷首之南鄭以為在雷首之北
恐悞

晉獻公竟滅之○

臣宗萬

按蘇轍疑魏入晉已久詩皆

為晉而作故列於唐風之前猶邶鄘之於衛朱子亦
云篇中公行公路公族皆晉官疑實晉詩然觀詩序
所言皆非晉事故朱子又云恐魏亦有此官未敢定
為晉詩也

唐譜其孫穆侯疏僖侯生獻侯籍籍生穆侯費王是也

○籍世本作蘇費王史記作潰王一本作弗生

又疏子鄂侯郤立○郤史記作郟

又疏鵠羽不為小子侯詩者以昭公肇為亂階○范
處義曰鵠羽繫之昭公非也據詩序言昭公之後大
亂五世自昭公至小子侯始及五世當作小子侯詩
秦譜堯時有伯翳者○史記作栢翳漢書作栢益

歷夏商興衰疏實鳥谷氏○谷史記作俗

周孝王使其末孫非子疏惡來有子曰女妨○妨史記

作防

又疏大凡生大雒。雒史記作駱

至元孫德公疏文公生靖公。靖史記作淨

疏其詩則車鄰美秦仲為秦仲詩也。○劉瑾曰秦仲
但為宣王大夫未必得備寺人之官此詩宜作於平
王命襄公為侯之後許謙亦云秦仲固嘗為附庸之
君以西戎滅大駱之族宣王命為大夫日與戎戰六
年而死非可樂時詩語不類然則車鄰實襄公詩爾

又疏晨風渭陽權輿序皆云康公是康公詩也。○許謙曰康公為太子時正穆世也當繫於穆公

陳譜封其子媯滿於陳。

臣會汾

按大戴禮禹受命乃

邑姚姓於陳是胡公乃繼封也

疏封黃帝之後於薊封帝堯之後於祝。

臣浩

按史

記作封黃帝之後於祝封帝堯之後於薊與樂記文異

五世至幽公疏弟平公彘立。○彘史記作燮

又疏月出亦從上明之亦為宣公詩也。○范處義曰
月出刺在位說美色正指孔寧儀行父之事宜繫之
靈公

檜譜檜國在禹貢豫州外方之地。○

臣光型

按外方先

儒皆以為嵩山在今河南府登封縣北十里徐廣曰
檜在密縣不得在外方北也

疏滎澤滎波一澤名也。○許謙曰滎波孔氏以為一
水周禮職方豫州其川滎雖其浸波澁則二水也禹

貢濟入河而南出溢為滎今鄭州滎澤是其處爾雅
水出自洛為波而山海經曰婁涿之山波水出其陰
北流注於穀二說未知孰是臣光型按滎波為二水
當從周禮職方為是波水當以洛南之波為是蔡氏
書傳亦從爾雅說若山海經之波水今本作陂郭璞
云世謂之百答水非此波水也

祝融氏名黎疏已姓昆吾蘇顧溫莒也○莒周語作董
曹譜曹之後世疏子桓公終生立○終生史記注一作

終渥

又疏子莊公射姑立○射姑史記作夕姑

豳譜以比序已志○金履祥曰七月非周公所作乃豳之舊詩故豳七月附於十五國風之後猶商那附於三頌之末也周公食邑豳岐之間故凡周公之所作與為周公而作者皆附之

臣光聖

按鄭氏謂七月乃

周公述公劉太王之事亦是其謂周公以比序已志恐未必然也朱子辨序謂七月是未居東時作諒哉

後成王迎之反之。○迎之疑當作迎而觀下疏作而字可見

小大雅譜自文王至於文王有聲。○朱子云鄭譜以此為文武時詩文王首句即云文王在上則非文王時詩矣。又曰無念爾祖則非武王時詩矣。大明有聲並言文武者非一安得為文武之時所作乎。臣宗萬按

呂氏春秋云周公旦乃作詩曰文王在上於昭于天諸詩明是成王之時周公所作故文武皆稱謚也

疏則稱王之後作也○

臣光型

按文王未嘗生稱王

安得云稱王後作耶呂祖謙曰漢儒謂文王受命稱王靈臺為天子之制悖理甚矣

小雅自鹿鳴至於魚麗疏故以鹿鳴燕羣臣嘉賓之事

為首也○

臣浩

按鹿鳴之序甚當而漢儒多有異說

如司馬遷云仁義陵遲鹿鳴刺焉蔡邕云鹿鳴周大臣之所作王道衰大臣知賢者幽隱故彈絃諷諫此亦如康王晚朝闕睢諷諫之說鹿鳴冠小雅之首安

得以為刺詩

疏故次伐木燕朋友故舊也。

臣浩

按蔡邕正交論

云周德始衰頌聲既寢伐木有鳥鳴之刺亦以為刺詩

何者天子饗元侯疏於次國於小國。此六字不可解
別本於次國下又有次國二字亦不可解似是衍文
周頌譜疏又作武。范處義曰其詩云於皇武王豈武
王之自言乎

又疏其三曰敷時繹思我徂惟求定其六曰綏萬邦
屢豐年。臣光型按此三六之數杜預以為楚樂歌

之次第劉炫以為楚子引詩之次第或云此三六者
猶云肆夏之三也武賚桓明是三篇安得合之為一
當時未經夫子刪定而荆楚文獻不足猶為錯亂不
足信也

又疏明時邁與般武王時也。○范處義曰二詩當繫
之成王。臣浩按韓詩薛君章句云疊應也美成王能

奮舒文武之道而行之則天下無不動而應其政教
是韓詩以時邁為成王之詩范氏之說是也

魯頌譜自後政衰疏子考公首立○首世本作就

又疏子幽公宰立○宰世本作圉

又疏是為魏公○魏公世本作微公

又疏子厲公擢立○擢世本作翟

又疏子真公僂立○僂世本作摯

又疏子弗湮立○弗湮史記作弗湮世本作弗皇

商頌譜世有官守疏子曹圉立○曹圉世本作糧圉
又疏子振立○振世本作核

毛詩譜考證

毛詩注疏原目

毛詩國風音義

毛詩詩是此書之名毛者傳詩人姓既

毛公加毛詩二字又云河間獻王所加故大題在下案馬融盧植鄭玄註三禮並大題在下班固漢書陳

壽三國志題亦然國風國者總謂十五篇謂之正風疏正義諸侯之詩從闕雅至騶虞二十五篇

曰詩國風舊題也毛字漢世加之六藝論云河間獻王好學其傳士毛公善說詩獻王號之曰毛詩是獻

王始加毛也漢書儒林傳云毛公趙人也為河間獻王博士不言其名范曄後漢書云趙人毛長傳詩是

為毛詩然則趙人毛公名為長也譜云魯人大毛公為訓詁傳於其家河間獻王得而獻之以小毛公為

博士然則大毛公為其傳由小毛公而題毛也詩者一部之大名國風者十五國之總稱不冠於周南之

上而退在下者按鄭注三禮周易中侯尚書皆大名在下孔安國馬季長盧植王肅之徒其所注者莫不盡然然則本題自然非注者移之定本亦然當以皆在第二下足得總攝故也班固之作漢書陳壽之撰國志亦大名在下蓋取法於經典也言國風者國是風化之界詩以當國為別故謂之國風其雅則天子之事政教刑于四海不須言國也周召風之正經固當為首自衛以下十有餘國編比先後舊無明說去聖久遠難得而知欲言先後為次則齊哀先於衛頃鄭武後於檜國而衛在齊先檜處鄭後是不由作之先也後也欲以國地為序則鄭小於齊魏狹於晉而齊後於鄭魏先於唐是不由國之大小也欲以采得為次則鷄鳴之作遠在緇衣之前鄭國之風必處檜詩之後何當後作先采先作後采乎是不由采得先後也二三擬議悉皆不可則諸國所次別有意焉蓋迹其先封善否參其詩之美惡驗其時政得失詳其國之

大小斟酌所宜以爲其次邨鄘衛者商紂畿內千里之地柏舟之作夷王之時有康叔之遺烈武公之盛德資母弟之戚成入相之勲文公則滅而復興徙而能富土地既廣詩又早作故以爲變風之首既以衛國爲首邨鄘則衛之所滅風俗雖異美刺則同依其作之先後故以邨鄘先衛也周則平王東遷政遂微弱化之所被纔及郊畿詩作後於衛頃國地狹於千里徒以天命未改王爵仍存不可過于後諸侯故使次之於衛也鄭以史伯之謀列爲大國桓爲司徒甚得周衆武公夾輔平王克成大業有厲宣之親有緇得周衆武公夾輔平王克成大業有厲宣之親有緇衣之美其地雖狹既親且勲故使之次王也齊則異姓諸侯世有衰德哀公有荒淫之風襄公有鳥獸之行辭皆怨刺篇無美者又以大師之後國土仍大故使之次鄭也魏國雖小儉而能勤踵虞舜之舊風有夏禹之遺化故季札觀樂美其詩音云大而婉儉而易行以德輔此則明主也故次於齊唐者叔虞之後

雖為大國昭公則五世交爭獻後則喪亂弘多故次
於魏下秦以秦仲始大襄公始命穆公遂霸西戎卒
為強國故使之次唐也陳以三格之尊食侯爵之地
但以民多淫昏國無令主故使之次秦也檜則其君
淫恣曹則小人多寵國小而君奢民勞而政僻季札
之所不譏國風次之於末宜哉幽者周公之事欲尊
周公使專一國故次於衆國之後小雅之前欲兼其
上下之美非諸國之例也鄭譜王在幽後者退就雅
頌并言王世故耳諸國之次當是大師所第孔子刪
定或亦改張襄二十九年左傳魯為季札偏歌周樂
齊之下即歌幽歌秦然後歌魏杜預云於詩幽第十
五秦第十一後仲尼刪定故不同杜以為今所第皆
孔子之制孔子之前則如左傳之次鄭意或亦然也
鄉飲酒云無算樂註云燕樂亦無算數或間或合盡
歡而止春秋襄二十九年吳公子札來聘請觀於周
樂此國君之無算也以其偏歌謂之無數不以不次

為無鄭氏箋音義箋本亦作版同薦年反字林云箋表也識也案鄭六藝論云注詩宗

毛為主毛義若隱畧則更表明如有不同即下已意使可識別也然此題非毛公馬鄭王肅等題相傳云是雷次宗題承用既久未敢為異又案周續之與雷次宗同受慧遠法師詩義而續之釋題已如此又恐非雷之題也疏正義曰鄭氏名玄字康成北海高密人當後漢桓靈之時注此書也不言疑未敢明之疏人當後漢桓靈之時注此書也不言名而言氏者漢承滅學之後典籍出於人間各專門命氏以顯其家之學故諸為傳訓者皆云氏不言名由此而言毛氏為傳亦應自載毛字但不必冠詩上耳不然獻王得之何知毛為之也明其自言毛矣鄭於諸經皆謂之注此言箋者呂忱字林云箋者表也識也鄭以毛學審備遵暢厥旨所以表明毛意記識其事故特稱為箋餘經無所遵奉故謂之注注者著也言為之解說使其義著明也漢初為傳訓者皆與

經別行三傳之文不與經連故石經書公羊傳皆無
經文藝文志云毛詩經二十九卷毛詩故訓傳三十
卷是毛為詁訓亦與經別也及馬融為周禮之注乃
云欲省學者兩讀故具載本文然則後漢以來始就
經為注未審此詩引經附傳是誰為之其鄭之箋當
元在經傳之下矣其毛詩經二十九卷不知併何卷
也自周南至鄭氏箋凡一十六字所題非一時也周
南關雎至第一詩國風元是大師所題也詁訓傳毛
自題之毛一字獻王加
之鄭氏箋鄭自題之

周南關雎詁訓傳第一音義

周南周者代名其地在
禹貢雍州之域岐山之

陽於漢屬扶風美陽縣南者言周之德化自岐陽而
先被南方故序云化自北而南也漢廣序又云文王
之道被於南國是也雎七胥反依字且邊佳且音子
餘反旁或作鳥故訓舊本多作故今或作詁音古又

音故傳音直戀反案詰故皆是古義所以兩行然前
儒多作詰解而章句有故言郭景純注爾雅則作釋
詰樊孫等爾雅本皆為釋
疏正義曰闕雉者詩篇之
故今宜隨本不煩改字
名既以闕雉為首遂以

闕雉為一卷之目金滕云公乃為詩以貽王名之曰
鵠然則篇名皆作者所自名既言為詩乃云名之
則先作詩後為名也名篇之例義無定準多不過五
少纔取一或偏舉兩字或全取一句偏舉則或上或
下全取則或盡或餘亦有捨其篇首撮章中之一言
或復都遺見文假外理以定稱黃鳥顯縣蠻之貌草
蟲葉嚶嚶之聲瓜瓞取縣縣之形瓞葉捨番番之狀
天天與桃名而俱舉蚩蚩從氓狀而見遺召是韓奕
則采台上下騶虞權輿則并舉篇末其中踏駁不可
勝論豈古人之無常何立名之異與以作非一人故
名無定目詰訓傳者注解之別名毛以爾雅之作多
為釋詩而篇有釋詰釋訓故依爾雅訓而為詩立傳

傳者傳通其義也爾雅所釋十有九篇獨云詁訓者詁者古也古今異言通之使人知也訓者道也道物之貌以告人也釋言則釋詁之別故爾雅序篇云釋詁釋言通古今之字古與今異言也釋訓言形貌也然則詁訓者釋古今之異辭辨物之形貌則解釋之義盡歸於此釋親已下皆指體而釋其別亦是詁訓之義故唯言詁訓足總衆篇之目今定本作故以詩云古訓是式毛傳云古故也則故訓者故昔與訓依故昔典訓而為傳義或當然毛傳不訓序者以分置篇首義理易明性好簡畧故不為傳鄭以序下無傳不須辨嫌故註序不言箋說文云第次也字從竹弗稱第一者言其次第當一所以分別先後也

召南鵲巢詁訓傳第二音義

召亦地名也在岐山之陽扶風雍縣南有召亭

案周召皆周之舊土文王受命後以賜二公為采地二南之風皆文王未受命之詩也周南十一篇是先

王之所以教聖人之深迹故繫之公旦召南十四篇是先王之教化文王所行之漢迹故繫之君奭

邶柏舟詁訓傳第三音義

鄭云邶衛者殷紂畿內地名屬古冀州自紂城而

北曰邶南曰鄘東曰衛衛在汲郡朝歌縣時康叔正封於衛其末子孫稍并兼彼二國混其地而名之作者各有所傷從其本國而異之故有邶鄘衛之詩王肅同從此訖幽七月十三國並變風也邶蒲對反本又作鄘字林方代反

鄘柏舟詁訓傳第四音義

鄘音容鄭云紂都以南曰鄘王云王城以西曰鄘也

衛淇奥詁訓傳第五音義

鄭王俱云紂都之東也

王黍離詁訓傳第六音義

王國者周室東都王城畿內之地在豫州今之洛陽

是也幽王滅平王東遷政遂微弱詩不能復雅下列稱風以王當國猶春秋稱王人

鄭緇衣詁訓傳第七音義

鄭者國名周宣王母弟桓公友所封也其地詩譜云

宗周圻內咸林之地今京兆鄭縣是其都也漢書地理志云京兆鄭縣周宣王弟鄭桓公邑是也至桓公之子武公滑突隨平王東遷遂滅號鄆而居之即史伯所云十邑之地右洛左濟前華後河食溱洧焉今河南新鄭是也在蒙陽宛陵縣西南

齊鷄鳴詁訓傳第八音義

齊者太師呂望所封之國也其地少昊爽鳩氏之墟

在禹貢青州岱嶺之陰淮淄之野都營丘之側禮記云太公封於營丘是也

魏葛屨詁訓傳第九音義

案魏世家及左氏傳云姬姓國也詩譜云周以封同

姓其地虞舜夏禹所都之域也在古冀州
雷首之北析城之西南枕河曲北涉汾水

唐蟋蟀詁訓傳第十音義

唐者周成王之母弟叔虞所封也其地帝堯夏禹所

都之墟漢曰太原郡在古冀州太行恒山之西太原
大岳之野其南有晉水叔虞之子燮父因改為晉侯
至六世孫僖侯名司徒習堯儉約遺化而
不能以禮節之今詩本具風俗故云唐也

秦車鄰詁訓傳第十一音義

秦者隴西谷名也在雍
州鳥鼠山之東北昔皋

陶之子伯翳佐禹治水有功舜命作虞賜姓曰嬴其
末孫非子為周孝王養馬於汧渭之間封為附庸邑
于秦谷及非子之曾孫秦仲周宣王又命為大夫仲
之孫襄公討西戎救周周室東遷以岐豐之地賜之
始列為諸侯春秋時稱秦伯崔云
秦在虞夏商為諸侯至周為附庸

陳宛丘詁訓傳第十二音義

陳者胡公媯滿之所封也其先虞舜之胄有虞

過父者為周陶正武王賴其器用與其神明之後故妻以元女其子滿乃封於陳以備三恪其地安義之

墟在古豫州之

界宛丘之側

檜羔裘詁訓傳第十三音義

檜者高辛氏之火正祝融之後妘姓之國也其

封域在古豫州外方之北滎波之南居漆洧之間祝融之故墟是子男之國後為鄭武所并焉王云周武

王封之於濟洛河潁之間為檜子檜本又作鄒古外反

曹蜩螗詁訓傳第十四音義

曹者武王之弟叔振鐸所封之國也爵為伯其

封域在兗州陶丘之北荷澤之野今濟陰定陶是也

豳七月詁訓傳第十五音義

豳者戎狄之地名也夏道衰后稷之曾孫公劉

自邠而出居焉其封域在雍州岐山之北原隰之野於漢屬右扶風邠邑周公遭流言之難居東都思公劉大王為豳公憂勞民事以此叙已志而作七月鵠鶚之詩成王悟而迎之以致太平故太師述其詩為

豳國之風焉

小雅音義

從鹿鳴至菁菁者莪凡二十二篇皆正小雅六篇亡今唯十六篇從此至魚麗十篇是文

武之小雅先其文王以治內後其武王以治外宴勞嘉賓親睦九族事非隆重故為小雅皆聖人之迹故謂之正

鹿鳴之什詁訓傳第十六音義

什音十什者若五等之君有詩各繫其國

舉周南即題闕雖至於王者施教統有四海歌詩之作非止一人篇數既多故以十篇編為一卷名之為什

南有嘉魚之什詁訓傳第十七音義

自此至菁菁者莪六篇并亡篇

三是成王周公之小雅成王有雅名公有雅德二人協佐以致太平故亦並為正也

鴻鴈之什詁訓傳第十八

節南山之什詁訓傳第十九音義

從此至何草不黃凡四十四篇前儒

申毛皆以為幽王之變小雅鄭以十月之交以下四篇是厲王之變小雅漢興之初師移其篇次毛為詁

訓因改

其第焉

谷風之什詁訓傳第二十

甫田之什詁訓傳第二十一

魚藻之什詁訓傳第二十二

大雅音義

自此以下至卷阿十八篇是文王武王成王周公之正大雅據盛隆之時而推序天命上

述祖考之美皆國之大事故為正大雅焉文王至靈臺八篇是文王之大雅下武文王有聲二篇是武王之雅之大

文王之什詁訓傳第二十三

生民之什詁訓傳第二十四音義

自生民至卷阿八篇成王周公之正

大雅

蕩之什詁訓傳第二十五

周頌音義

周頌三十一篇皆是周室太平德治著成功之樂歌也名之曰頌頌者誦也容也歌誦盛

德序太平之形容以此至美告於神明皆成王周公時作也

清廟之什詁訓傳第二十六

臣工之什詁訓傳第二十七

閔予小子之什詁訓傳第二十八

魯頌音義

魯者周公之子伯禽所封之國也周公有大勲勞於天下成王留之輔相而封伯禽焉其

封域在禹貢徐州蒙羽之野十七世至倍公當周惠王襄王之時能尊伯禽之法外征淮夷內修德教國
人美之於是國卿季文子諸周而使史克作頌四篇
夫子刪詩錄之者以周公有致太平之勲成王命魯
郊祭用天子禮樂故取魯
頌而同於王者之後焉

駟之什詁訓傳第二十九音義

作駟之什者是隨例而加耳商頌亦然

商頌音義

商者契所封之地名成湯伐桀王天下遂以爲國號後世有中宗高宗中興時有作詩頌

之者當周宣王之時宋大夫正考父校商之名頌十
二篇於周之大師以那爲首歸而祭於先王孔子錄
詩之時止五篇而已
乃列之以備三頌

那之什詁訓傳第三十

毛詩注疏原目

毛詩注疏原目考證

周南關雎詁訓傳音義舊本多作故○顏師古漢書注
云故者通其指義也今流俗故訓傳改為詁字失真
耳

召南鵲巢詁訓傳音義扶風雍縣有召亭○

臣光型按

召亭在今陝西鳳翔府岐山縣南十里文王時召公
食采邑也又山西絳州垣曲縣亦有召亭春秋時召
公食采邑也

魏葛屨詁訓傳音義按魏世家及左氏傳云姬姓國也

○ 臣德齡

按史記魏世家乃晉獻公所封畢萬之魏

畢亦姬姓然非此魏也孔氏正義云魏世家絕而陸氏乃云案魏世家誤矣

唐蟋蟀詁訓傳音義叔虞之子熒父○

臣祖庚

按史記

漢書鄭譜孔正義皆作熒此作熒父殆二名止舉其一猶晉重耳稱晉重曹叔振鐸稱叔振之類歟

節南山之什詁訓傳音義從此至何草不黃凡四十四

篇前儒申毛皆以為幽王之變小雅。

臣光型

按申

公之詩亡於西晉其說固不可考然觀漢書谷永傳
閭婁驕扇顏師古注云魯詩言厲王無道內寵熾盛
是以十月之交為厲王變小雅正申公之說未嘗以
為皆幽王詩也

毛詩注疏原目考證

毛詩注解傳述人

唐國子博士兼太子中允贈齊州刺史吳縣開國男陸德明錄

詩者所以言志吟詠性情以諷其上者也古有采詩

之官王者巡守則陳詩以觀民風知得失自考正也

動天地感鬼神厚人倫美教化移風俗莫近乎詩是

以孔子最先刪錄既取周詩上兼商頌凡三百一十

一篇

毛公為故訓時已亡六篇故藝文志云三百五篇

以授子夏子夏遂作

序焉

或曰毛公作序解見前

口以相傳未有章句戰國之世專

任武力雅頌之聲為鄭衛所亂其廢絕亦可知矣遭

秦焚書而得全者以其人所諷誦不專在竹帛故也

漢興傳者有四家魯人申公

亦謂申培公楚王大傳武帝以安車蒲輪徵之

時申公年八十餘以為大中大夫

受詩於浮丘伯以詩經為訓故以

教無傳疑者則闕不傳號曰魯詩弟子為博士者十

餘人郎中令王臧

蘭陵人

御史大夫趙綰

代人

臨淮太守

孔安國膠西內史周霸城陽內史夏寬東海太守魯

賜碣石長沙內史繆生

蘭陵人

膠西中尉徐偃膠東內史

關門慶忌

鄉人

皆申公弟子也申公本以詩春秋授瑕

丘江公盡能傳之徒衆最盛魯許生免中徐公

免中縣名

皆守學教授丞相韋賢受詩於江公及許生傳子玄

成

賢字長孺玄成字少翁父子並為丞相封扶陽侯又治禮論語玄成兄子實以詩授哀帝大司馬車

騎將

又王式

字翁思東平新桃人昌邑王師受師於免中徐公及許

軍

生以授張生長安

名長安字幼君山陽人為博士論石渠至淮陽中尉

及唐長

賓

東平人為博士楚王太傅

褚少孫

沛人為博士褚氏家傳云即續史記褚先生

張生

兄子游卿

諫大夫

以詩授元帝傳王扶

琅邪人泗水

中尉扶授

許晏陳留人又薛廣德字長卿沛國相受詩于王式

授龔舍字君倩楚國人太山太守齊人轅固生漢景帝時為博士至清河太傅作

詩傳號齊詩傳夏侯始昌始昌授后蒼字近君東海

為博士至少府蒼授龔奉字少君東海下邳人為博士諫大夫及蕭望之字長倩東

海蘭陵人御史大夫匡衡字稚圭東海承人丞相樂前將軍兼傳論語安侯子咸亦明經歷九卿

家世多衡授師丹字公仲琅邪及伏理字游君高密為博士人大司空太傅家世傳

業滿昌字君都潁昌授張邯九江人及皮容琅邪人皆至

大官徒眾尤盛後漢陳元方亦傳齊詩燕人韓嬰漢文

帝時為博士推詩之意作內外傳數万言号曰韓詩至常山太傅

淮南賁生受之武帝時嬰與董仲舒論於上前仲舒

不能難

嬰又為易傳燕趙間好詩故其易微唯韓氏自傳之

其孫商為博士孝

宣時涿韓生其後也河內趙子事燕韓生授同郡蔡

誼

誼以詩授昭帝至丞相封侯

誼授同郡食子公

為博士

及琅邪王

吉

字子陽王駿父昌邑中尉諫大夫吉兼五經能為鄒氏春秋以詩論教授

子公授太山

栗豐

部刺史

吉授淄川長孫順

為博士

豐授山陽張就順

授東海髮福

一本作段福

竝至大官藝文志云齊韓詩或

取春秋采雜說咸非其本義魯最為近之毛詩者出

自毛公河間獻王好之徐整

字文操豫章人吳太常卿

云子夏授

高行子高行子授薛倉子薛倉子授帛妙子帛妙子

授河間人大毛公毛公為詩故訓傳於家以授趙人

小毛公

名萇一云名萇

小毛公為河間獻王博士以不在漢朝

故不列於學一云子夏傳曾申

字子西魯人曾參之子

申傳魏

人李克克傳魯人孟仲子

鄭玄詩譜云子思之弟子

孟仲子傳根

牟子根牟子傳趙人孫卿子孫卿子傳魯人大毛公

漢書儒林傳云毛公趙人治詩為河間獻王博士授

同國貫長卿

徐整作長公

長卿授解延年

為阿武令詩譜云齊人

延

年授號徐敖教授九江陳俠

王莽講學大夫

或云陳俠傳謝

曼卿元始五年公車徵說詩後漢鄭眾賈逵傳毛詩

馬融作毛詩注鄭玄作毛詩箋申明毛義難三家於

是三家遂廢矣魏太常王肅更述毛非鄭荊州刺史

王基

字伯輿東萊人

駿王肅申鄭義晉豫州刺史孫毓

字休詡北

海平昌人長沙太守

為詩評評毛鄭王肅三家同異朋於王徐

州從事陳統

字元方

難孫申鄭宗徵士鴈門周續之

字道

祖及雷次宗俱事廬山惠遠法師

豫章雷次宗

字仲倫宋通直郎徵不起

齊沛國

劉瓛竝為詩序義前漢魯齊韓三家詩列于學官平

帝世毛詩始立齊詩久亡魯詩不過江東韓詩雖在

人無傳者唯毛詩鄭箋獨立國學今所遵用毛詩故

訓傳二十卷

鄭氏箋

馬融注十卷

無下秩

王肅注二十卷

謝沈注二十卷江熙注二十卷

字太和濟陽人東晉兗州別駕

鄭玄

詩譜二卷

徐整暢大叔表隱

孫毓詩同異評十卷陸璣毛詩

草木鳥獸蟲魚疏二卷

字元恪吳郡人吳太子中庶子烏程令為詩音

者九人鄭玄徐邈蔡氏孔氏阮侃王肅江惇干寶李

軌

阮侃字德恕陳留人河内太守江惇字思俊河内人東晉徵士蔡氏孔氏不詳何人

梁有桂

州刺史清河崔靈恩集衆解為毛詩集注二十四卷

俗間又有徐爰詩音近吳興沈重亦撰詩音義

毛詩注解傳述人

欽定四庫全書

經部

毛詩注疏卷一

詳校官監察御史_臣王爾烈

通政使司副使_臣莫瞻菴覆勘

覆校官監丞_臣侍朝

校對官主事_臣李駿

謄錄舉人_臣馬衍宗

欽定四庫全書卷

毛詩注疏卷一

漢鄭氏箋

唐陸德明音義

孔穎達疏

國風

周南

序關雎后妃之德也音義

關雎舊解云三百一十一篇詩並是作者自為名妃

芳非反爾雅云妃嬈也對也

左傳云嘉耦曰妃禮記

云天子之妃曰后舊說云起此至用之邦國焉名關

雎序謂之小序自風風也訖末名為大序沈重云案

鄭詩譜意大序是子夏作小序是子夏毛公合作卜

案

商意有不盡毛更足成之或云小序是東海衛敬仲所作今謂此序止是關雎之序總論詩之綱領無大小之異解見詩義序並是鄭注所疏正義曰諸序皆以無箋云者以無所疑亂故也

疏 一篇之義但詩理深廣此為篇端故以詩之大綱併舉於此今分為十五節當節自解次第於此不復煩文作關雎詩者言后妃之德也曲禮曰天子之妃曰后注云后之言後也執理內事在夫之後也釋詁云妃嬈也言嬈匹於夫也天子之妻唯稱后耳妃則上下通名故以妃配后而言之德者得也自得於身人行之總名此篇言后妃性行和諧貞專化下寤寐求賢供奉職事是后妃之德也二南之風實文王之化而美后妃之德者以夫婦之性人倫之重故夫婦正則父子親父子親則君臣敬是以詩者歌其性情陰陽為重所以詩之為體多序男女之事不言美后妃者此詩之作直是感其德澤歌其性行欲以發揚聖化示語未知非

是褒賞后妃能為此行也正經例不言美皆此意也其變詩則政教已失為惡者多苟能為善則賞其善事征伐獫狁始見憂國之心瞻仰昊天方知風之始求雨之切意與正經有異故序每篇言美也

也所以風天下而正夫婦也故用之鄉人焉用之邦

國焉音義

風之始也此風謂十五國風風是諸侯政教也下云所以風天下論語云君子之德

風並是此義所以風如疏正義曰序以后妃樂得淑字徐福鳳反今不用疏女不淫其色家人之細事

耳而編於詩首用為歌樂故於后妃德下即申明此意言后妃之有美德文王風化之始也言文王行化始於其妻故用此為風教之始所以風化天下之民而使之皆正夫婦焉周公制禮作樂用之鄉人焉令鄉大夫以之教其民也又用之邦國焉令天下諸侯以之教其臣也欲使天子至於庶民悉知此詩皆正

夫婦也故鄭譜云天子諸侯燕其羣臣皆歌鹿鳴合鄉樂是也定本所以風天下俗本風下有化字誤也儀禮鄉飲酒禮者鄉大夫三年賓賢能之禮其經云乃合樂周南關雎是用之鄉人也燕禮者諸侯飲燕其臣子及賓客之禮其經云遂歌鄉樂周南關雎是用之邦國也施化之法自上而下當天子教諸侯諸侯教大夫大夫教其民今此先言風天下而正夫婦焉既言化及於民遂從民而廣之故先鄉人而後邦國也老子云修之家其德乃餘修之邦其德乃豐修之天下其德乃普亦自狹至廣與此同意也

風也教也風以動之教以化之音義

風風也並如字徐上如字下福

鳳反崔靈恩集注本下即作諷字劉氏云動物曰風託音曰諷崔云用風感物則謂之諷沈云上風是國風即詩之六義也下風即是風伯鼓動之風君上風教能鼓動萬物如風之偃草也今從沈說風以動之

如字沈福鳳反云謂自下刺疏正義曰上言風之始上感動之名變風也今不用謂教天下之始也序又解名教為風之意風訓諷也教也諷謂微加曉告教謂殷勤誨示諷之與教始末之異名耳言王者施化先依違諷諭以動之民漸開悟乃後明教命以化之風之所吹無物不扇化之所被無往不霑故取名

焉詩者志之所之也在心為志發言為詩疏

正義曰上言用

詩以教此又解作詩所由詩者人志意之所之適也雖有所適猶未發口蘊藏在心謂之為志發見於言乃名為詩言作詩者所以舒心志憤懣而卒成於歌詠故虞書謂之詩言志也包管萬慮其名曰心感物而動乃呼為志志之所適外物感焉言悅豫之志則和樂興而頌聲作憂愁之志則哀傷起而怨刺生藝文志云哀樂之情感歌詠之聲發此之謂也正情動經與變同名曰詩以其俱是志之所之故也情動

於中而形於言言之不足故嗟歎之嗟歎之不足故永歌之永歌之不足不知手之舞之足之蹈之也音

義

嗟迹斜反咨嗟也歎本亦作嘆傷贊反歎息也蹈徒到反動足履地也

疏

正義曰上云發言為

詩辨詩志之異而直言者非詩故更序詩必長歌之意情謂哀樂之情中謂中心言哀樂之情動於心志之中出口而形見於言初言之時直平言之耳既言之而意不足嫌其言未中志故咨嗟歎息以和續之嗟歎之猶嫌不足故長引聲而歌之長歌之猶嫌不足忽然不知手之舞之足之蹈之言身為心使不自覺知舉手而舞身動足而蹈地如是而後得舒心腹之憤故為詩必長歌也聖王以人情之如是故用詩於樂使人歌詠其聲象其吟詠之辭也舞動其容象其舞蹈之形也其承哀樂之形然後得盡其心術焉

情動於中還是在心為志而形於言還是發言為詩
上辨詩從志出此言為詩必歌故重其文也定本言
之不足故嗟歎之俗本言之下有者字誤也定本永
歌之不足下無故字有故字者亦誤也樂記云歌之
為言也長言之也說之故言之言之不足故長言之
長言之不足故嗟歎之嗟歎之不足故不知手之舞
之足之蹈之其文與此經畧同說之故言之謂說前
事言出於口與此情動形言一也虞書曰歌永言注
云歌所以長言詩之意是永歌長言為一事也樂記
注云嗟歎和續之也謂發言之後咨嗟歎息為聲以
和其言而繼續之也樂記先言長言之乃云嗟歎之
此先云嗟歎之乃云永歌之直言既已嗟歎長歌又
復嗟歎彼此各言其一故不同也藝文志云誦其言
謂之詩詠其聲謂之歌然則在心為志出口為言誦
言為詩詠聲為歌播於八音
情發於聲聲成文謂之
謂之為樂皆始末之異名耳

音箋發猶見也聲謂宮商角徵羽也聲成文者宮商

上下相應音義

見賢遍反徵陟里反上時疏正義曰掌反應應對之應下注同疏情發於

聲謂人哀樂之情發見於言語之聲於時雖言哀樂之事未有宮商之調唯是聲耳至於作詩之時則次序清濁節奏高下使五聲為曲似五色成文一人之心則能如此據其成文之響即是為音此音被諸絃管乃名為樂雖在人在器皆得為音下文治世之音謂樂音則此聲成文謂之音亦謂樂之音也原夫作樂之始樂寫人音人音有大小高下之殊樂器有宮徵商羽之異依人音而制樂託樂器以寫人是樂本效人非人效樂但樂曲既定規矩先成後人作詩模準舊法此聲成文謂之音若據樂初之時則人能成文始入於樂若據制樂之後則人之作詩先須成樂之文乃成為音聲能寓情情皆可見聽音而知治亂

觀樂而曉盛衰故神聲有以知其趣也設有言而非
志謂之矯情情見於聲矯亦可識若夫取彼素絲織
為綺殺或色美而材薄或文惡而質良惟善賈者別
之取彼歌謠播為音樂或辭是而意非或言邪而志
正唯達樂者曉之樂記曰其哀心感者其聲嗛以殺
其樂心感者其聲發以散是情之所感入於樂也季
札見歌唐曰思深哉其有陶唐氏之遺民乎是樂之
聲音得其情也若徒取辭賦不達音聲則身為桀紂
之行口出堯舜之辭不可得而知也是以楚茨大田
之徒並陳成王之善行露汝墳之篇皆述紂時之惡
以汝墳為王者之風楚茨為刺過之雅大師曉其作
意知其本情故也箋正義曰春官太師職云文之以
五聲宮商角徵羽是聲必有五故引五聲之名以解
之五聲之配五方也於月令角東商西徵南羽北宮
在中央立名還以其方為義漢書律曆志云商之為
言章也物成孰可章度也角觸也物觸地而出戴芒

角也宮中也居中中央暢四方唱始施生為四聲之綱也徵祉也物盛大而蕃祉也羽宇也物聚藏宇覆之也又云宮為君君是陽陽數極於九故宮數八十一三分去一以生徵徵數五十四三分益一以生商商數七十二三分去一以生羽羽數四十八三分益一以生角角數六十四樂記云聲相應故生變變成方謂之音注云方猶文章也樂之器彈其宮則衆宮應然不足樂是以變之使雜也引昭二十年左傳曰若以水濟水誰能食之若琴瑟之專壹誰能聽之是解聲必須雜之意也此言聲成文謂之音則聲與音別樂記注雜比曰音單出曰聲記又云審聲以知音審音以知樂則聲音樂三者不同矣以聲變乃成音音和乃成樂故別為二名對文則別散則可以通季札見歌秦曰此之謂夏聲公羊傳云十一而稅頌聲作聲即音也下云治世之音音即樂也是聲與音樂各得相通也樂記子夏對魏文侯云君之所問者樂也

所好者音也。夫樂者與音相近而不同。又以音樂為異者。以文侯并問古樂新樂二者同。呼為樂。謂其樂音同也。子夏以古樂順於民而當於神。與天下同樂。故定為樂名。新樂淫於色而害於德。直申說其音而已。故變言溺音。以曉文侯耳。音樂非為異也。樂記云。淫樂愚禮。子夏亦云。古樂之發。新樂之發。是鄭衛之樂也。音亦為。

治世之音安以樂。其政和。亂世之音怨以怒。

其政乖。亡國之音哀以思。其民困。音義。

治直吏反之音。絕句。樂音。

洛絕句。其政和一。讀安字上屬。以樂其政和為一句。下放此。思息吏反。

疏

正義曰。序既云。情見於聲。

又言聲隨世變。治世之音既安。又以懽樂者。由其政教和睦故也。亂世之音既怨。又以恚怒者。由其政教乖戾故也。亡國之音既哀。又以愁思者。由其民之困苦故也。樂記云。其哀心感者。其聲噍。以殺其樂心。感

者其聲嘽以緩彼說樂音之中兼有二事此安以樂
怨以怒亦與彼同治世之政教和順民心民安其化
所以喜樂述其安樂之心而作歌故治世之音亦安
以樂也良耜云百室盈止婦子寧止安之極也湛露
云厭厭夜飲不醉無歸樂之至也天保云民之質矣
日用飲食是其政和也亂世之政教與民心乖戾民
怨其政教所以忿怒述其怨怒之心而作歌故亂世
之音亦怨以怒也蓼莪云民莫不穀我獨何害怨之
至也巷伯云取彼譖人投畀豺虎怒之甚也十月云
徹我牆屋田卒汙萊是其政乖也國將滅亡民遭困
厄哀傷已身思慕明世述其哀思之心而作歌故亡
國之音亦哀以思也茗之華云知我如此不如無生
哀之甚也大東云旒言顧之潛焉出涕思之篤也正
月云民今之無祿天夫是極是其民困也詩述民志
樂歌民詩故時政善惡見於音也治世謂天下和平
亂世謂兵革不息亡國謂國之將亡也亂世謂世亂

而國存故以世言之亡國則國亡而世絕故不言世也亂世言政亡國不言政者民困必政暴舉其民困為甚辭故不言政也亡國者國實未亡觀其歌詠知其必亡故謂之亡國耳非已亡也若其已亡則無復作詩不得有亡國之音此云亂世亡國者謂賢人君子聽其樂音知其亡亂故謂之亂世之音亡國之音樂記所云鄭衛之音亂世之音桑間濮上之音亡國之音與此異也淫恣之人肆於民上滿志縱欲甘酒嗜音作為新聲以自娛樂其音皆樂而為之無哀怨也樂記云樂者樂也君子樂得其道小人樂得其欲彼樂得其欲所以謂之淫樂為此樂者必亂必亡故亦謂之亂世之音亡國之音耳與此不得同也若然此二者言哀樂出於民情樂音從民而變乃是人能變樂非樂能變人案樂記稱人心感於物而後動先王慎所以感之者故作樂以和其聲樂之感人深其移風易俗又云志微噍殺之音作而民剛毅廉直莊

誠之音作而民肅敬寬裕順成之音作而民慈愛流
僻邪散之音作而民淫亂如彼文又是樂能變人樂
由王者所制民遂樂音而變此言民能變樂彼言樂
能變人者但兆民既衆賢愚不等以賢哲歌謠采詩
定樂以賢者所樂教愚者為樂取智者之心變不智
者之心制禮之事亦猶是也禮者稱人之情而為之
節文賢者俯而就之不肖者企而及之是下民之所
行非聖人之所行也聖王亦取賢行以教不賢舉得
中以裁不中禮記問喪稱禮者非從天降非從地出
人情而已矣是禮之本意出於民也樂記又曰凡音
之起由人心生也樂者樂其所自生是樂之本意出
於民也樂記又曰夫物之感人無窮而人之好惡無
節則是物至而人化物也人化物也者滅天理而窮
人欲者也於是有悖逆詐偽之心有淫佚作亂之
事故先王制禮作樂為之節是王者采民情制禮樂
之意禮樂本出於民還以教民與夫雲出於山復雨

其山火生於木反
焚其木復何異哉
故正得失動天地感鬼神莫近於

詩音義

正得失周云正齊人之得失也本又作政
謂政教也兩通近如字沈音附近之近

疏

正義曰上言播詩於音音從政變政之善惡皆在於
詩故又言詩之功德也由詩為樂章之故正人得失
之行變動天地之靈感致鬼神之意無有近於詩者
言詩最近之餘事莫之先也公羊傳說春秋功德云
撥亂世反諸正莫近諸春秋何休云莫近猶莫過之
也詩之道所以能有此三事者詩者志之所歌歌者
人之精誠精誠之志以類相感詩人陳得失之事以
為勸戒令人行善不行惡使失者皆得是詩能正得
失也普正人之得失非獨正人君也下云上以風化
下下以風刺上是上下俱正之也人君誠能用詩人
之美道聽嘉樂之正音使賞善伐惡之道舉無不當
則可使天地效靈鬼神降福也故樂記云姦聲感人

而逆氣應之逆氣成象而淫樂興焉正聲感人而順
氣應之順氣成象而和樂興焉又曰歌者直己而陳
德也動己而天地應焉四時和焉星辰理焉萬物育
焉此說聲能感物能致順氣逆氣者也天地云動鬼
神云感互言耳周禮之例天曰神地曰祇人曰鬼鬼
神與天地相對唯謂人之鬼神耳從人正而後能感
動故先言正得失也此正得失與雅者正也正
始之道本或作政皆誤耳今定本皆作正字 先王

以是經夫婦成孝敬厚人倫美教化移風俗音義厚

后本或疏正義曰上言詩有功德此言用詩之事經
作序非疏夫婦者經常也夫婦之道有常男正位乎
外女正位乎內德音莫違是夫婦之常室家離散夫
妻反目是不常也教民使常此夫婦猶商書云常厥
德也成孝敬者孝以事親可移於君敬以事長可移
於貴若得罪於君親失意於長貴則是孝敬不成故

教民使成此孝敬也厚人倫者倫理也君臣父子之義朋友之交男女之別皆是人之常理父子不親君臣不敬朋友道絕男女多違是人理薄也故教民使厚此人倫也美教化者美謂使人服之而無厭也若設言而民未盡從是教化未美故教民使美此教化也移風俗者地理志云民有剛柔緩急音聲不同繫水土之風氣故謂之風好惡取舍動靜隨君上之情欲故謂之俗則風為本俗為末皆謂民情好惡也緩急繫水土之氣急則失於躁緩則失於慢王者為政當移之使緩急調和剛柔得中也隨君上之情則君有善惡民竝從之有風俗傷敗者王者為政當易之使善故地理志又云孔子曰移風易俗莫善於樂言聖王在上統理人倫必移其本而易其末然後王教成是其事也此皆用詩為之故云先王是以用也言先王用詩之道為此五事也案王制云廣谷大川異制民生其間者異俗修其教不易其俗此云易俗

彼言不易者彼謂五方之民戎夷殊俗言語不通器械異制王者就而撫之不復易其器械同其言音故言不易其俗與此異也此序言詩能易俗孝經言樂能移風俗者詩是樂之心樂為詩之聲故詩樂同其功也然則詩樂相將無詩則無樂周存六代之樂豈有黃帝之時有樂而無詩何能移風易俗斯不然矣原夫樂之初也始於人心出於口歌聖人作八音之器以文之然後謂之為音謂之為樂樂雖逐詩為曲做詩為音曲有清濁次第之序音有宮商相應之節其法既成其音可久是以昔日之詩雖絕昔日之樂常存樂本由詩而生所以樂能移俗歌其聲謂之樂誦其言謂之詩聲言不同故異時別教王制稱春教樂夏教詩經解稱溫柔敦厚詩教也廣博易良樂教也由其事異故異教也此之謂詩樂據五帝以還詩樂相將故有詩則有樂若上皇之世人故詩有六義性醇厚徒有嬉戲之樂未有歌詠之詩

焉一曰風二曰賦三曰比四曰興五曰雅六曰頌音

義

此必履反興虛應反沈許甄反頌音訟

疏

正義曰上言詩功既大明非一義能周故又言詩有

六義大師上文未有詩字不得徑云六義故言六詩各自為文其實一也彼注云風言聖賢治道之遺化賦之言鋪直鋪陳今之政教善惡比見今之失不敢斥言取比類以言之興見今之美嫌於媚諛取善事以喻勸之雅正也言今之正者以為後世法頌之言誦也容也誦今之德廣以美之是解六義之名也彼雖各解其名以詩有正變故互見其意風云聖賢之遺化謂變風也雅云言今之正以為後世法謂正雅也其實正風亦言當時之風化變雅亦是賢聖之遺法也頌訓為容止云誦今之德廣以美之不解容之義謂天子美有形容下云美盛德之形容是其事也賦云鋪陳今之政教善惡其言通正變兼美刺也比

云見今之失取比類以言之謂刺詩之比也興云見今之美取善事以勸之謂美詩之興也其實美刺俱有比興者也鄭必以風言賢聖之遺化舉變風者以唐有堯之遺風故於風言賢聖之遺化賦之直陳其事無所避諱故得失俱言比者比託於物不敢正言似有所畏懼故云見今之失取比類以言之興者興起志意讚揚之辭故云見今之美以喻勸之雅既以齊正為名故云以為後世法鄭之所注其意如此詩皆用之於樂言之者無罪賦則直陳其事於比興云不敢斥言嫌於媚諛者據其辭不指斥若有嫌懼之意其實作文之體理自當然非有所嫌懼也六義次第如此者以詩之四始以風為先故曰風風之所用以賦比興為之辭故於風之下即次賦比興然後次以雅頌雅頌亦以賦比興為之既見賦比興於風之下明雅頌亦同之鄭以賦之言鋪也鋪陳善惡則詩文直陳其事不譬喻者皆賦辭也鄭司農云比者比

方於物諸言如者皆比辭也司農又云興者託事於物則興者起也取譬引類起發已心詩文諸舉草木鳥獸以見意者皆興辭也賦比興如此次者言事之道直陳為正故詩經多賦在比興之先比之與興雖同是附託外物比顯而興隱當先顯後隱故比居興先也毛傳特言興也為其理隱故也風雅頌者皆是施政之名也上云風風也教也風以動之教以化之是風為政名也下云雅者正也政有小大故有小雅焉有大雅焉是雅為政名也周頌譜云頌之言容天子之德光被四表格于上下此之謂容是頌為政名也人君以政化下臣下感政作詩故還取政教之名以為作詩之目風雅頌同為政稱而事有積漸教化之道必先諷動之物情既悟然後教化使之齊正言其風動之初則名之曰風指其齊正之後則名之曰雅風俗既齊然後德能容物故功成乃謂之頌先風後雅頌為此故也一國之事為風天下之事為雅

者以諸侯列土封疆風俗各異故唐有堯之遺風魏有儉約之化由隨風設教故名之為風天子則威加四海齊正萬方政教所施皆能齊正故名之為雅風雅之詩緣政而作政既不同詩亦異體故七月之篇備有風雅頌駉頌序云史克作是頌明作者本意自定為風體非采得之後始定體也詩體既異其聲亦殊公羊傳曰十一而稅頌聲作史記稱微子過殷墟而作雅聲譜云師摯之始關雎之亂早失風聲矣樂記云人不能無亂先王恥其亂故制雅頌之聲以道之是其各自別聲也詩各有體體各有聲大師聽聲得情知其本意周南為王者之風召南為諸侯之風是聽聲而知之也然則風雅頌者詩篇之異體賦比興者詩文之異辭耳大小不同而得並為六義者賦比興是詩之所用風雅頌是詩之成形用彼三事成此三事是故同稱為義非別有篇章也鄭志張逸問何詩近於比賦興答曰比賦興吳札觀詩已不歌也

孔子錄詩已合風雅頌中難復摘別篇中義多興逸見風雅頌有分段以為比賦興亦有分段謂有全篇為比全篇為興欲鄭指摘言之鄭以比賦興者直是文辭之異非篇卷之別故遠言從本來不別之意言吳札觀詩已不歌明其先無別體不可歌也孔子錄詩已合風雅頌中明其先無別體不可分也元來合而不分今日難復摘別也言篇中義多興者以毛傳於諸篇之中每言興也以興在篇中明比賦亦在篇中故以興顯比賦也若然比賦興元來不分唯有風雅頌三詩而已六藝論云至周分為六詩者據周禮六詩之文而言之耳非謂篇卷也或以為鄭云孔子已合於風雅頌中則孔子以前未合之時比賦興別為篇卷若然則離其章句析其文辭樂不可歌文不可誦且風雅頌以比賦興為體若比賦興別為篇卷則無風雅頌矣是比賦興之義有詩則有之唐虞之世治政昇平周於太平之世無諸侯之風則唐虞之

世必無風也雅雖王者之政乃是太平前事以堯舜之聖黎民時雍亦似無雅於六義之中唯應有頌耳夏在制禮之後不復面稱目諫或當有雅夏氏之衰昆吾作霸諸侯彊盛或當有風但篇章泯滅無以言之六藝論云唐虞始造其初至周分為六詩據周禮成文而言之詩之六義非起於周也

上以風

化下下以風刺上主文而譎諫言之者無罪聞之者足以戒故曰風箋風化風刺皆謂譬喻不斥言也主

文主與樂之宮商相應也譎諫詠歌依違不直諫音

義

下以風福鳳反注風刺同刺本又作刺七賜反譎古穴反詐也故曰風福鳳反又如字

疏正

曰臣下作詩所以諫君君又用之教化故又言上下皆用此上六義之意在上人君用此六義風動教化

在下人臣用此六義以風喻箴刺君上其作詩也本
心主意使合於宮商相應之文播之於樂而依違譎
諫不直言君之過失故言之者無罪人君不怒其非
主而罪戮之聞之者足以自戒人君自知其過而悔
之感而不切微動若風言出而過改猶風行而草偃
故曰風上言風風也教也向下以中風義此云故曰
風向上而結彼文使首尾相應解盡風義此六義之
下而解名風之意則六義皆名為風以風是政教之
初六義風居其首故六義總名為風六義隨事生稱
耳若此辭總上六義則有正變而云主文譎諫唯說
刺詩者以詩之作皆為正邪防失雖論功誦德莫不
匡正人君故主說作詩之意耳詩皆人臣作之以諫
君然後人君用之以化下此先云上以風化下者以
其教從君來上下俱用故先尊後卑襄十六年左傳
稱齊人伐魯求救於晉晉人不許穆叔見中行獻子
賦圻父獻子曰偃知罪矣穆叔賦詩而晉人不得怨

之是言之者無罪也獻子服罪是聞之者足以戒也俗本戒上有自字者誤定本直云足以戒也箋正義曰風者若風之動物故謂之譬喻不斥言也人君教民自得指斥但用詩教民播之於樂故亦不斥言也上言聲成文此言主文知作詩者主意令詩文與樂之宮商相應也如上所說先為詩歌樂逐詩為曲則是宮商之辭學詩文而為之此言作詩之文主應於宮商者初作樂者準詩而為聲聲既成形須依聲而作詩故後之作詩者皆主應於樂文也謫者權詐之名託之樂歌依違而諫亦權詐之義故謂之謫諫

至於王道衰禮義廢政教失國異政家殊俗而變風

變雅作矣疏

正義曰詩之風雅有正有變故又言變之意至於王道衰禮義廢而不行政教

施之失所遂使諸侯國國異政下民家家殊俗詩人見善則美見惡則刺之而變風變雅作矣至於者從

盛而至於衰相承首尾之言也禮義言廢者典法仍存但廢而不行耳政教言失者非無政教但施之失理耳由施之失理故使國國異政家家殊俗皆是道衰之事故云道衰以冠之禮義者政教之本故先禮義而後政教定本禮義廢俗本有作儀字者非也此家謂天下民家孝經云非家至而日見之也亦謂天下民家非大夫稱家也民隨君上之欲故稱俗若大夫之家不得謂之俗也變風變雅必王道衰乃作者夫天下有道則庶人不議治平累世則美刺不興何則未識不善則不知善為善未見不惡則不知惡為惡太平則無所更美道絕則無所復譏人情之常理也故初變惡俗則民歌之風雅正經是也始得太平則民頌之周頌諸篇是也若其王綱絕紐禮義消亡民皆逃死政盡紛亂易稱天地閉賢人隱於此時也雖有智者無復譏刺成王太平之後其美不異於前故頌聲止也陳靈公淫亂之後其惡不復可言故變

風息也班固云成康沒而頌聲寢王澤竭而詩不作此之謂也然則變風變雅之作皆王道始衰政教初失尚可匡而革之追而復之故執彼舊章繩此新失觀望自悔其心更遵正道所以變詩作也以其變改正法故謂之變焉季札見歌小雅曰美哉思而不貳怨而不言其周德之衰乎猶有先王之遺民是由王澤未竭民尚知禮以禮救世作此變詩故變詩王道衰乃作也譜云夷身失禮懿始受譖則周道之衰自夷懿始矣變雅始於厲王無夷懿之雅者蓋孔子錄而不得或有而不足錄也昭十二年左傳稱祭公謀父作祈招之詩以諫穆王衛頃齊哀之時而有變風明時作變雅但不錄之耳王道衰諸侯有變風王道盛諸侯無正風者王道明威政出一人太平非諸侯之力不得有正風王道既衰政出諸侯善惡在於己身不由天子之命惡則民怨善則民喜故各從其國有美刺之變風也

國史明乎得失

之迹傷人倫之廢哀刑政之苛吟詠情性以風其上

音義

苛本亦作荷音同苛虐也吟疑今反動聲曰吟風福鳳反

疏

正義曰上既言變詩之作此又

說作變之由言國之史官皆博聞強識之士明曉於人君得失善惡之迹禮義廢則人倫亂政教失則法令酷國史傷此人倫之廢棄哀此刑政之苛虐哀傷之志鬱積於內乃吟詠己之情性以風刺其上觀其改惡為善所以作變詩也國史者周官大史小史外史御史之等皆是也此承變風變雅之下則兼據天子諸侯之史矣得失之迹者人君既往之所行也明曉得失之迹哀傷而詠情性者詩人也非史官也民勞常武公卿之作也黃鳥碩人國人之風然則凡是臣民皆得風刺不必要其國史所為此文特言國史者鄭答張逸云國史采衆詩時明其好惡令瞽矇歌之其無作主皆國史主之令可歌如此言是由國史

掌書故託文史也苟能制作文章亦可謂之為史不
必要作史官駟云史克作是頌史官自有作詩者矣
不盡是史官為之也言明其好惡令瞽瞍歌之是國
史選取善者始付樂官也言其無作主國史主之嫌
其作者無名國史不主之耳其有作主亦國史主之
耳人倫之廢即上禮義廢也刑政之苛即上政教失
也動聲曰吟長言曰詠作詩必歌故言吟詠情性也達於事變而懷其舊俗者

也故變風發乎情止乎禮義發乎情民之性也止乎

禮義先王之澤也疏

正義曰此又言王道既衰所以能作變詩之意作詩者皆曉達

於世事之變易而私懷其舊時之風俗見時世政事
變易舊章即作詩以舊法誠之欲使之合於禮義故
變風之詩皆發於民情止於禮義言各出民之情性
而皆合於禮義也又重說發情止禮之意發乎情者

民之性言其民性不同故各言其志也止乎禮義者
先王之澤言俱被先王遺澤故得皆止禮義也展轉
申明作詩之意達於事變者若唐有帝堯殺禮救危
之化後世習之失之於儉不中禮陳有太姬好巫歌
舞之風後世習之失之於遊蕩無度是其風俗改變
詩人曉達之也懷其舊俗者若齊有太公之風衛有
康叔之化其遺法仍在詩人懷救之也詩人既見時
世之事變改舊時之俗故依準舊法而作詩戒之雖
俱準舊法而詩體不同或陳古政治或指世淫荒雖
復屬意不同俱懷匡救之意故各發性情而皆止禮
義也此亦兼論變雅獨言變風者上已變風變雅雙
舉其文此從省而略之也先王之澤謂先王有德澤
而流及於後世詩人得其餘化故能懷其舊俗也鄭
答張逆云舊俗者若晉有堯之遺風先王之澤衛有
康叔餘烈如此言則康叔當云先公而云先王者以
變雅有先王之澤變風有先公之澤故季札見歌齊

曰表東海者其太公乎見歌小雅曰猶有先王之遺民是其風稟先公雅稟先王也上舉變風下言先王風雅互相見也上言國史作詩此言民之性明作詩皆出民意非獨國史能為亦是互見也作詩止於禮義則應言皆合禮而變風所陳多說姦淫之狀者男淫女奔傷化敗俗詩人所陳者皆亂狀淫形時政之疾病也所言者皆忠規切諫救世之針藥也尚書之三風十愆疾病也詩人之四始六義救藥也若夫疾病尚輕有可生之道則醫之治也用心銳扁鵲之療太子知其必可生也疾病已重有將死之勢則醫之治也用心緩秦和之視平公知其不可為也詩人救世亦猶是矣典刑未亡覲可追改則箴規之意切鴈鳴汚水殷勤而責王也淫風大行莫之能救則匡諫之志微秦洧桑中所以咨嗟歎息而閔世陳鄭之俗亡形已成詩人度已箴規必不變改且復賦已之志哀歎而已不敢望其存是謂匡諫之志微故季札見

歌陳曰國無主其能久乎見歌鄭曰美哉其細已甚
民弗堪也是其先亡乎美者美詩人之情言不有先
王之訓孰能若此先亡者見其
匡諫意微知其國將亡滅也 是以一國之事繫一

人之本謂之風言天下之事形四方之風謂之雅疏

正義曰序說正變之道以風雅與頌區域不同故又
辯三者體異之意是以者承上生下之辭言詩人作
詩其用心如此一國之政事善惡皆繫屬於一人之
本意如此而作詩者謂之風言道天下之政事發見
四方之風俗如是而作詩者謂之雅言風雅之別其
大意如此也一人者作詩之人其作詩者道已一人
之心耳要所言一人之心乃是一國之心詩人覽一
國之意以為己心故一國之事繫此一人使言之也
但所言者直是諸侯之政行風化於一國故謂之風
以其狹故也言天下之事亦謂一人言之詩人總天

下之心四方風俗以為己意而詠歌王政故作詩道
說天下之事發見四方之風所言者乃是天子之政
施齊正於天下故謂之雅以其廣故也風之與雅各
是一人所為風言一國之事雅言一人雅亦天下之事
繫一人雅言天下之事謂一人言天下之事風亦一
人言一國之事序者逆順立文互言之耳故志張逸
問嘗聞一人作詩何謂答曰作詩者一人而已其取
義者一國之事變雅則幾王政得失閔風俗之衰所
憂者廣發於一人之本身如此言風雅之作皆是一
人之言耳一人美則一國皆美之一人刺則天下皆
刺之谷風黃鳥妾怨其夫未必一國之妾皆怨夫也
北門北山下怨其上未必一朝之臣皆怨上也但舉
其夫婦離絕則知風俗敗矣言已獨勞從事則知政
教偏矣莫不取衆之意以為己辭一人言之一國皆
悅假使聖哲之君功齊區宇設有一人獨言其惡如
弁隨務光之羞見殷湯伯夷叔齊之恥事周武海內

之心不同之也無道之主惡加萬民設有一人獨稱其善如張竦之美王莽蔡邕之惜董卓天下之意不與之也必是言常舉世之心動合一國之意然後得為風雅載在樂章不然則國史不錄其文也此言謂之風雅理無正變天下無道政出諸侯而變雅亦稱雅者當作變雅之時王政仍被邦國大學曰堯舜率天下以仁而民從之桀紂率天下以暴而民從之是善政惡政皆能正人所以幽厲之詩亦名為雅及平王東遷政遂微弱其政纔行境內是以變為風焉

雅者正也言王政之所由

廢興也政有小大故有小雅焉有大雅焉疏

正義曰上已解

風名故又解雅名雅者訓為正也由天子以政教齊正天下故民述天子之政還以齊正為名王之齊正天下得有道則述其美雅之正經及宣王之美詩是也若王之齊正天下失其理則刺其惡幽厲小雅是

也詩之所陳皆是正天下大法文武用詩之道則興
幽厲不用詩道則廢此雅詩者言說王政所用廢興
以其廢興故有美刺也又解有二雅之意王者政教
有小大詩人述之亦有小大故有小雅焉有大雅焉
小雅所陳有飲食賓客賞勞羣臣燕賜以懷諸侯征
伐以強中國樂得賢者養育人材於天子之政皆小
事也大雅所陳受命作周伐殷繼代荷先王之福祿
尊祖考以配天醉酒飽德能官用士澤被昆蟲仁及
草木於天子之政皆大事也詩人敷其大事制為大
體述其小事制為小體體有大小故分為二焉風見
優劣之差故周南先於召南雅見積漸之義故小雅
先於大雅此其所以異也詩體既異樂音亦殊國風
之音各從水土之氣述其當國之歌而作之雅頌之
音則王者編覽天下之志總合四方之風而制之樂
記所謂先王制雅頌之聲以道之是其事也詩禮既
定樂音既成則後之作者各從舊俗變風之詩各是

其國之音季札觀之而各知其國由其音與故也小雅音體亦然正經述大政為大雅述小政為小雅有小雅大雅之聲王政既衰變雅兼作取大雅之音歌其政事之變者謂之變大雅取其小雅之音歌其政事之變者謂之變小雅故變雅之美刺皆由音體有大小不復由政事之大小也風述諸侯之政非無小大但化止一國不足分別頌則功成乃作歸美報神皆是大事無復別體故不分為二風二頌也定本王政所由廢興俗本王政下有之字誤也

頌者美盛德之形容以其成功

告於神明者也音義

告古疏正義曰上解風雅之名毒反疏風雅之體故此又解頌

名頌體上文因變風變雅作矣即說風雅之體故言謂之風謂之雅以結上文此上未有頌作之言文無所結故云頌者美盛德之形容明訓頌為容解頌名也以其成功告於神明解頌體也上言雅者正也此

亦當云頌者容也以惟已備文此亦從可知故畧之也易稱聖人擬諸形容象其物宜則形容者謂形狀容貌也作頌者美盛德之形容則天子政教有形容也可美之形容正謂道教周備也故頌譜云天子之德光被四表格于上下無不覆燾無不持載此之謂容其意出於此也成功者營造之功畢也天之所營在於命聖聖之所營在於任賢賢之所營在於養民民安而財豐衆和而事節如是則司牧之功畢矣干戈既戢夷狄來賓嘉瑞悉臻遠邇咸服羣生盡遂其性萬物各得其所即是成功之驗也萬物本於天人本於祖天之所命者牧民也祖之所命者成業也民安業就須告神使知雖社稷山川四嶽河海皆以民為主欲民安樂故作詩歌其功徧告神明所以報神恩也王者政有興廢未嘗不祭羣神但政未太平則神無恩力故太平德洽始報神功頌詩直述祭祀之狀不言得神之力但美其祭祀是報德可知此解頌

者唯周頌耳其商魯之頌則異於是矣商頌雖是祭祀之歌祭其先王之廟述其生時之功正是死後頌德非以成功告神其體異於周頌也魯頌主詠僖公功德纔如變風之美者耳又與商頌異也頌者美詩之名王者不陳魯詩魯人不得作風以其得用天子之禮故借天子美詩之名改稱為頌非周頌之流也孔子以其同有頌名故取備三頌耳置之商頌前者以魯是周宗親同姓故使之先前世也

是謂

四始詩之至也箋始者王道興衰之所由疏

正義曰四始者

鄭答張逸云風也小雅也大雅也頌也此四者人君行之則為興廢之則為衰又箋云始者王道興衰之所由然則此四者是人君興廢之始故謂之四始也詩之至者詩理至極盡於此也序說詩理既盡故言此以終之案詩緯汎歷樞云大明在亥水始也四牡在寅木始也嘉魚在巳火始也鴻鴈在中金始也與

此不同者緯文因金木水火有四始之義以詩文託之又鄭作六藝論引春秋緯演孔圖云詩含五際六情者鄭以汎歷樞云午亥之際為革命卯酉之際為改正辰在天門出入候聽卯天保也酉祈父也午來也亥太明也然則亥為革命一際也亥又為天門出入候聽二際也卯為陰陽交際三際也午為陽謝陰興四際也酉為陰盛陽微五際也其六情者則春秋云喜怒哀樂好惡是也詩既含此五際六情故鄭於六藝然則關雎麟趾之化王者之風故繫之周公論言之

南言化自北而南也鵲巢騶虞之德諸侯之風也先王之所以教故繫之召公箋自從也從北而南謂其化從岐周被江漢之域也先王斥大王王季音義

麟

卒反趾音止騶本亦作駟側留反召本亦作邵同上
照反後召南召公皆同岐其宜反山名或作祗被皮
寄反大疏正義曰序因關雎是風化之始遂因而申
音泰疏之廣論詩義詩理既盡然後乃說周南召
南然者然上語則王者則下事因前起後之勢也然則
關雎麟趾之化是王者之風文王之所以教民也王
者必聖周公聖人故繫之周公不直名為周而連言
南者言此文王之化自比土而行於南方故也鵲巢
騶虞之德是諸侯之風先王大王王季所以教化民
也諸侯必賢召公賢人故繫之召公不復言南意與
周南同也周南言化召南言德者變文耳上亦云關
雎后妃之德是其通也諸侯之風言先王之所以教
王者之風不言文王之所以教者二南皆文王之化
不嫌非文王也但文王所行兼行先王之道感文王
之化為周南感先王之化為召南不言先王之教無
以知其然故特著之也此實文王之詩而繫之二公

者志張逸問王者之風王者當在雅在風何答曰文王以諸侯而有王者之化述其本宜為風逸以文王稱王則詩當在雅故問之鄭以此詩所述述文王為諸侯時事以有王者之化故稱王者之風於時實是諸侯詩人不為作雅文王三分有二之化故稱王者之風是其風者王業基本此述服事殷時王業基本之事故云述其本宜為風也化霜一國謂之為風道被四方乃名為雅文王纔得六州未能天下統一雖則大於諸侯正是諸侯之大者耳此二南之人猶以諸侯待之為作風詩不作雅體體實是風不得謂之為雅文王末年身實稱王又不可以國風之詩繫之王身名無所繫詩不可棄因二公為王行化是故繫之二公天子嫁女於諸侯使諸侯為之主亦此義也其鹿鳴文王詩人本以天子待之作雅非基本之事故不為風也若然作王者之風必感聖人之化已知文王之聖應知終必為王不為作雅而作風者詩者

志也各言其志文王於時未稱王號或為作雅或為作風人志不同故也箋正義曰釋詁云從自也反覆相訓是自得為從也文王之國在於岐周東北近於紂都西北迫於戎狄故其風化南行也漢廣序云美化行乎江漢之域是從岐州被江漢之域也大王始有王迹周之追謚上至大王而已故知先王斥大王

季周南召南正始之道王化之基疏

正義曰既言繫之周召又總舉

二南要義周南召南二十五篇之詩皆是正其初始之大道王業風化之基本也高以下為基遠以近為始文王正其家而後及其國是正其始也化南土以成王業是王化之基也季札見歌周南召南曰始基之矣猶未也服虔云未有雅頌之成功亦謂二南為王化基始序意出於彼文也是以關雎

樂得淑女以配君子憂在進賢不淫其色哀窈窕思

賢才而無傷善之心焉是關雎之義也箋哀蓋字之

誤也當為衷衷謂中心恕之無傷善之心謂好逑也

音義

淑常六反善也哀前儒竝如字論語云哀而不

反毛云窈窕幽閒也王肅云善心曰窈善容

疏正義

曰上

曰窈怨音庶本又作念好呼報反述音求

既總言二南又說關雎篇義覆述上后妃之德由言
二南皆是正始之道先美家內之化是以關雎之篇
說后妃心之所樂樂得此賢善之女以配己之君子
心之所憂憂在進舉賢女不自淫恣其色又哀傷處
窈窕幽閒之女未得升進思得賢才之人與之共事
君子勞神苦思而無傷害善道之心此是關雎詩篇
之義也毛意當然定本是關雎之義俗本足下有以
者誤也鄭以衷為衷言后妃衷心念恕在窈窕幽閒

之善女思使此女有賢才之行欲令宮內和協而無
傷害善人之心餘與毛同婦人謂夫為君子上下之
通名樂得淑女以配君子言求美德善女使為夫婦
御與之共事文王五章皆是也女有美色男子悅之
故經傳之文通謂女人為色淫者過也過其度量謂
之為淫男過愛女謂淫女色女過求寵是自淫其色
此言不淫其色者謂后妃不淫恣己身之色其者其
后妃也婦德無厭志不可滿凡有情欲莫不妬忌唯
后妃之心憂在進賢賢人不進以為己憂不縱恣已
色以求專寵此生民之難事而后妃之性能然所以
歌美之也毛以為哀窈窕之人與后妃同德者也后
妃以己則能配君子彼獨幽處未升故哀念之也既
哀窈窕之未升又思賢才之良質欲進舉之也哀勤
寃還是樂得淑女也思賢才還是憂在進賢也殷勤
而說之也指斥詩文則憂在進賢下三章是也不淫
其色首章上二句是也此詩之作主美后妃進賢所

以能進賢者由不淫其色故先言不淫其色序論作者之意主在進賢故先云進賢所以經序倒也鄭解哀字為異其經亦與毛同箋正義曰以后妃之求賢女貞思念之耳無哀傷之事在其間也經云鐘鼓樂之琴瑟友之哀樂不同不得有悲哀也故云蓋字之誤箋所易字多矣皆注云當為某字此在詩初故云蓋為疑辭以下皆倣此哀與忠字異而義同於大中心為忠如心為恕故云恕之謂念恕此竊窬之女思使之有賢才言不忌勝已而害賢也無傷害之心謂不用傷害善人經稱衆妾有述怨欲令竊窬之女和諧不用使之相傷害故云謂好述也論語云關雎樂而不淫哀而不傷即此序之義也論語注云哀世夫婦不得此人不知為滅傷其愛此以哀為哀彼仍以哀為義者鄭答劉琰云論語注人間行久義或宜然故不復定以遺後說是鄭以為疑故兩解之也必知毛異於鄭者以此詩出於毛氏字與三家異者動以百

數此序是毛置篇端若毛知其誤自當改之何須仍作哀字也毛無破字之理故知從哀之義毛既以哀為義則以下義勢皆異於鄭思賢才謂思賢才之善女也無傷善之心言其能使善道全也庸人好賢則志有懈倦中道而廢則善心傷后妃能寤寐而思之反側而憂之不得不已未嘗懈倦是其善道必至無傷缺之心然則毛意無傷善之心當謂三章是也王肅云哀窈窕之不得思賢才之良質無傷善之心焉若苟慕其色則善心傷也

關關雎鳩在河之洲傳興也關關和聲也雎鳩王雎也鳥摯而有別水中可居者曰洲后妃說樂君子之德無不和諧又不淫其色慎固幽深若雎鳩之有別焉然後

可以風化天下夫婦有別則父子親父子親則君臣敬
君臣敬則朝廷正朝廷正則王化成箋云摯之言至也
謂王雎之鳥雌雄情意至然而有別窈窕淑女君子好
逌傳窈窕幽閒也淑善逌匹也言后妃有關雎之德是
幽閒貞專之善女宜為君子之好匹箋云怨耦曰仇言
后妃之德和諧則幽閒處深宮貞專之善女能為君子
和好衆妾之怨者言皆化后妃之德不嫉妬謂三夫人
以下音義雎七胥反鳩九尤反鳥之有至別者洲音州
興虛應反沈許甄反案興是譬喻之名意有

不盡故題曰興他皆放此摯本亦作驚音至別彼竭反
下同說音悅樂音洛諧戶皆反朝直遙反廷徒佞反好
毛如字鄭呼報反兔置詩放此速音求本亦作仇音同
閒音閑下同耦五口反能為于偽反嫉音疾徐音自後
皆同妬丁路疏正義曰毛以為關關然聲音和美者是
反以色曰妬雌鳩也此雌鳩之鳥雖雌雄情至猶能
自別退在河中之洲不乘匹而相隨也以興情至性行
和諧者是后妃也后妃雖說樂君子猶能不淫其色退
在深宮之中不褻瀆而相慢也后妃既有是德又不妬
忌思得淑女以配君子故窈窕然處幽閒貞專之善女
宜為君子之好匹也以后妃不妬忌可共以事夫故言
宜也鄭唯下二句為異言幽閒之善女謂三夫人九嬪
既化后妃亦不妬忌故為君子文王和好衆妾之怨耦
者使皆說樂也傳正義曰釋詁云關關雍雍音聲和也
是關關為和聲也雌鳩王雎也釋鳥文郭璞曰鷓鴣類也
今江東呼之為鷓鴣好在江邊沙中亦食魚陸璣疏云雎

鳩大小如鷓深目目上骨露幽州人謂之鷓而揚雄許慎皆曰白鷓似鷓尾上白定本云鳥鷓而有別謂鳥中雌雄情意至厚而猶能有別故以興后妃說樂君子情深猶能不淫其色傳為鷓字實取至義故箋云鷓之言至王雎之鳥雌雄情意至然而有別所以中成毛傳也俗本云雎鳩王雎之鳥者誤也水中可居者曰洲釋水文也李巡曰四方皆有水中央獨可居釋水又曰小洲曰渚小渚曰汙小汙曰坻江有渚傳曰渚小洲也蘓葭傳曰傳谷風箋竝云小渚曰汙皆依爾雅為說也采蘋傳曰汙渚蘓鶩傳曰渚汙言以曉人也蘓葭傳文云坻小渚也不言小渚者汙渚大小異名耳坻亦小於渚故舉渚以言之和諧者心中和悅志意諧適每事皆然故云無不和谐又解以在河之洲為喻之意言后妃雖悅樂君子不淫其色能謹慎貞固居在幽閒深宮之內不妄淫褻君子若雎鳩之有別故以興焉后妃之德能如是然後可以風化天下使夫婦有別夫婦有別則性純子

孝故能父子親也孝子為臣必忠故父子親則君臣敬
君臣既敬則朝廷自然嚴正朝廷既正則天下無犯非
禮故王化得成也窈窕者謂淑女所居之宮形狀窈窕
然故箋言幽閒深宮是也傳知然者以其淑女已為善
稱則窈窕宜為居處故云幽閒言其幽深而閒靜也揚
雄云善心為窈善容為窕者非也述匹釋詁文孫炎云
相求之匹詩本作述爾雅多作仇字異音義同也又曰
后妃有闡睢之德是幽閒貞專之善女宜為君子之好
匹者美后妃有思賢之心故說賢女宜求之狀總言宜
求為君子好匹則總謂百二十人矣箋正義曰下箋三
夫人九嬪以下此直云三夫人以下然則九嬪以下總
謂眾妾三夫人以下唯兼九嬪耳以其淑女和好眾妾
據尊者故唯指九嬪以上也求策論皆樂后妃之事故
兼言九嬪以下總百二十人也若然此眾妾謂世婦女
御也周禮注云世婦女御不言數者君子不苟於色有
婦德者充之無則闕所以得有怨者以其職卑德小不

欽定四庫全書



毛詩注疏
卷一

三

能無怨故淑女和好之見后妃和諧能化羣下雖有小怨和好從化亦所以明后妃之德也此言百二十人者周南王者之風以天子之數擬之非其時即然也何者文王為諸侯早矣豈先無嬪妾一人皆須后妃求之且百二十人之數周禮始置鄭於檀弓差之帝嚳立四妃帝堯因焉舜不告而娶不立正妃夏增以九女為十二人殷則增以二十七人為三十九人至周增以八十一人為百二十人當殷之時唯三十九人况文王為諸侯世子豈有百二十人也

參差荇菜左右流之傳荇接余也流求也后妃有關雎之德乃能共荇菜備庶物以事宗廟也箋云左右助也言后妃將共荇菜之菹必有助而求之者言三夫人九

嬪以下皆樂后妃之事窈窕淑女寤寐求之傳寤覺寐

寢也箋云言后妃覺寐則常求此賢女欲與之共已職

也音義

參初金反差初宜反又初佳反苻衡猛反本亦作若沈有竝反左右王中毛如字鄭上音佐下

音佑接余音餘本或作萋茶非共音恭本或作供下共苻萊竝同菹阻魚反字又作菹嬪鼻申反內官名樂音洛又音岳寤五路反疏正義曰毛以為后妃性既和諧

寐莫利反覺音教疏居后職當共苻萊以事宗廟

后妃言此參差然不齊之苻萊須嬪妾左右佐助而求之由此之故思求淑女窈窕然幽閒貞專之善女后妃

寤寐之時常求之也鄭以為夫人几嬪既不妬忌世婦女御以無怨爭上下說樂同化后妃故於后妃將共參

差之苻萊以事宗廟之時則嬪御之等皆競佐助后妃而求之言皆樂后妃之事既言樂助后妃然後倒本其

事。后妃今日所以得佐助者，由此幽閒之善，女未得之時，后妃於覺寐之中，常求之欲與之共，已職事，故得之也。傳正義曰：釋草云：「荇，接余其葉，符陸璣疏云：「接余，白莖，葉紫，赤色，正員，徑寸餘，浮在水上，根在水底，與水深淺等大，如釵股，上青，下白，鬻其白莖，以苦酒浸之，肥美可釀酒，是也。」定本「荇接余也」，俗本「荇下有菜字」，衍也。流求釋言文也，所以論求菜事，以美后妃者，以德不和諧，不當神明，則不能事宗廟。今后妃和諧，有闕睢之德，乃能共荇菜，備庶物，以事宗廟也。案天官醢人：「陳四豆之實，無荇菜者，以殷禮詩詠時事，故有之言備庶物者，以荇菜亦庶物之一，不謂今后妃盡備庶物也。禮記祭統曰：「水草之俎，陸產之醢，小物備矣。」三牲之俎，八簋之實，美物備矣。昆蟲之異，草木之實，陰陽之物，備矣。凡天之所生地之所長，苟可薦者，莫不咸在，示盡物也。是祭必備庶物也。此經序無言祭事，知事宗廟者，以言左右流之助。后妃求荇菜，若非祭菜，后不親采，采繁言夫人奉

祭明此亦祭也箋正義曰左右助也釋詁文此章未得
荇菜故助而求之既得故四章論采之采之既得故卒
章言擇之皆是淑女助后妃故每云左右此章始求謂
未當祭時故云將共荇菜四章琴瑟友之卒章鐘鼓樂
之皆謂祭時故箋云共荇菜之時也此云助而求之謂
未祭時亦贊助也故天官九嬪職云凡祭祀贊后薦徹
豆籩世婦職云祭之日涖陳女官之具凡內羞之物女
御職曰凡祭祀贊世婦天官序宮注云夫人之於后猶
三公之於王坐而論婦禮無官職之事明祭時皆在故
下章論祭時皆有淑女之文明贊助可知也此九嬪以
下兼世婦女御也言皆樂后妃之事者明既化其德又
樂其事見后妃德盛感深也事者荇菜之事也事為勞
務尚能樂之
況於其德乎
求之不得寤寐思服
傳服思之也箋云服
事也求賢女而不得覺寐則思已職事當誰與共之乎

悠哉悠哉輾轉反側傳悠思也箋云思之哉思之哉言

已誠思之卧而不周曰輾音義

悠音由輾本亦作展哲善反吕忱從車展鄭云

不周曰輾注本或作卧而不周者刺二字也

疏

正義曰毛以為后妃求此賢女之不得則覺寐之中服膺

念慮而思之又言后妃誠思此淑女哉誠思此淑女哉其思之時則輾轉而復反側思念之極深也鄭唯以服

為事求賢女而不得覺寐則思已職事當誰與共之餘同也傳正義曰王肅云服膺思念之箋以釋詁文服事

也本求淑女為已職事故思之也箋正義曰書傳曰帝猶反側晨興則反側亦卧而不正也反側既為一則輾

轉亦為一俱為卧而不周矣箋獨以輾為不周者辨其難明不嫌與轉異也澤波云輾轉伏枕枕據身伏而

不周則輾轉同為不周明矣反側猶反覆輾轉猶婉轉俱是迴動大同小異故何人斯箋反側輾轉是也

參差荇菜左右采之箋云言后妃既得荇菜必有助而采之者窈窕淑女琴瑟友之傳宜以琴瑟友樂之箋云同志為友言賢女之助后妃共荇菜其情意乃與琴瑟之志同共荇菜之時樂必作疏正義曰毛以為后妃本已求淑女之意言既求得參差之荇菜須左右佐助而采之故所以求淑女也故思念此處窈窕然幽閒之善女若來則琴瑟友而樂之思設樂以待之親之至也鄭以為后妃化感羣下既求得之又樂助采之言參差之荇菜求之即得諸嬪御之等皆樂左右助而采之既化后妃莫不和親故當共荇菜之時作此琴瑟之樂樂此窈窕之淑女其情性之和上下相親與琴瑟之音宮商相應無異若與琴瑟為友然共之同志故云琴瑟友之傳正義曰此稱后妃之

意后妃言已思此淑女若來已宜以琴瑟友而樂之言友者親之如友下傳曰德盛者宜有鐘鼓之樂與此章互言也明淑女若來琴瑟鐘鼓竝有故此傳并云友樂之亦逆取下章之意也以樂有二等相分以著義琴瑟樂之細者先言之見其和親鐘鼓樂之大者故卒章言之顯其德盛毛氏於序不破哀字則此詩所言思求淑女而未得也若得則設琴瑟鐘鼓以樂此淑女故孫毓述毛云思淑女之未得以禮樂友樂之是思之而未致樂為淑女設也知非祭時設樂者若在祭時則樂為祭設何言德盛設女德不盛豈祭無樂乎又琴瑟樂神何言友樂也豈得以祭時之樂友樂淑女乎以此知毛意思淑女未得假設之辭也箋正義曰人之朋友執志協同今淑女來之雍穆如琴瑟之聲和二者志同似於人友故曰同志為友琴瑟與鐘鼓同為祭時但此章言采之故以琴瑟為友以韻之卒章云芼故以鐘鼓為樂以韻之俱祭時所用而分為二等耳此箋樂必作兼下鐘

鼓也下箋琴瑟在堂亦取此云琴瑟友之言淑女以琴瑟為友下云鐘鼓樂之共苻菜之事為鐘鼓樂淑女二文不同者因事異而變其文以琴瑟相和似人情志故以反言之鐘鼓鏗宏非情志可比故以樂言之見祭時淑女情志之和

參差苻菜左右采之傳采擇也箋云后

而因聽祭樂也

妃既得苻菜必有助而擇之者窈窕淑女鐘鼓樂之傳

德盛者宜有鐘鼓之樂箋云琴瑟在堂鐘鼓在庭言共

苻菜之時上下之樂皆作盛其禮也音義

采毛報反樂之音洛又音

岳或云協韻

疏

傳正義曰釋言云采擣也孫炎曰皆擇

宜五教反

疏

菜也某氏曰擣猶拔也郭璞曰拔取菜

也以擣是拔之義史記云斬將擣旗謂拔取敵人之旗也采訓為拔而此云采之故知拔菜而擇之也箋正義

曰知琴瑟在堂鐘鼓在庭者臯陶謨云琴瑟以詠祖考來格乃云下管鼗鼓明琴瑟在上鼗鼓在下大射禮頌鐘在西階之西笙鐘在東階之東是鐘鼓在庭也此詩美心妃能化淑女共樂其事既得苻菜以祭宗廟上下樂作感此淑女所共之禮也樂雖主神因共苻菜歸美淑女耳

關雎五章章四句故言三章一章章四句二章章

八句音義

五章是鄭所分故言以疏正義曰自古下是毛公本意後放此疏而有篇章之

名與詩禮俱興也故那序曰得商頌十二篇東山序曰一章言其完是也句則古者謂之為言論語云詩三百一言以蔽之曰思無邪則以思無邪一句為一言左氏曰臣之業在揚之水卒章之四言謂第四句不敢告人也及趙簡子稱子太叔道我以九言皆以一句為一言也秦漢以來衆儒各為

訓詁乃有句稱論語注云此我行其野之句是也
句必聯字而言句者局也聯字分疆所以局言者
也章者明也總義包體所以明情者也篇者徧也
言出情鋪事明而徧者也然字之所用或全取以
制義開關雖鳩之類也或假辭以為助者乎而只
且之類也句者聯字以為言則一字不制也以詩
者申志一字則言塞而不會故詩之見句少不減
二即祈父肇禋之類也三字者緩萬邦屢豐年之
類也四字者開關雖鳩窈窕淑女之類也五字者
誰謂雀無角何以穿我屋之類也六字者昔者先
王受命有如召公之臣之類也七字者如彼築室
於道謀尚之以瓊華乎而之類也八字者十月蟋
蟀入我牀下我不敢效我友自逸是也其外更不
見九字十字者勢虞流別論云詩有九言者洞酌
彼行潦挹彼注茲是也徧檢諸本皆云洞酌三章
章五句則以為二句也顏延之云詩體本無九言

者將由聲度開緩不協金石仲治之言未可據也
句字之數四言為多唯以二三七八者將由言以
中情唯變所適播之樂器俱得成文故也詩之大
體必須依韻其有乖者古人之韻不協耳之兮矣
也之類本取以為辭雖在句中不以為義故處末
者皆字上為韻之者左右流之寤寐求之之類也
兮者其實七分迨其言兮之類也矣者韻之厚矣
出自口矣之類也者何其處也必有與也之類
也乎者俟我于著乎而伐檀且漣漪之篇此等皆
字上為韻不為義也然人志各異作詩不同必須
聲韻諧和曲應金石亦有即將助句之字以當聲
韻之體者則彼人是哉子曰何其不思其反反是
不思亦已焉哉是寃是闕豈其然乎其虛其徐既
亟只且之類是也章者積句所為不限句數也以
其作者陳事須有多少章總一義必須意盡而成
故也累句為章則一句不可二句得為之虛令及

魚麗之下三章是也其三句則麟趾甘棠騶虞之類是也其多者載芣三十一句閟宮之三章三十句自外不過也篇之大小隨章多少風雅之中少猶兩章以上即騶虞渭陽之類是也多則十六以下正月桑柔之類是也唯周頌三十一篇及那烈祖玄鳥皆一章者以其風雅敘人事刺過論功志在匡救一章不盡重章以申殷勤故風雅之篇無一章者頌者太平德洽之歌述成功以告神直言寫志不必殷勤故一章而已魯頌不一章者魯頌美僖公之事非告神之歌此則論功頌德之詩亦殷勤而重章也雖云盛德所同魯僖實不及制故頌體不一也高宗一人而玄鳥一章長發殷武重章者或詩人之意所作不同或以武丁之德上不及成湯下又踰於魯僖論其至者同於太平之歌述其祖者同於論功之頌明成功有大小其篇詠有優劣乎立章之法不常厥體或重章共述一

事采蘋之類或一事疊為數章甘棠之類或初同而末異東山之類或首異而末同漢廣之類或事訖而更申既醉之類或章重而事別鴟鵂之類何草不黃隨時而改色文王有聲因事而變文采采芣苢一章而再言賓之初筵三章而一發或篇有數章章句衆寡不等章有數句句字多少不同皆由各言其情故體無恒式也東山序云一章二章三章四章不謂末章為卒章及左傳曰七月之卒章又揚之水卒章者東山分別章意從一而終於四故不言卒章也左傳言卒章者卒終也言終篇之章言卒者對始也終篇為卒章則初篇為首章矣故鄭注禮記云緇衣之首章是也若然言卒者對首也則武唯一章而左傳曰作武其卒章曰耆定爾功者以耆定爾功是章之卒句故也大司樂注云騶虞樂章名在召南之卒章者正謂其卒篇謂之章者乘上騶虞為樂章故言在召南之卒章

也定本章句在篇後六藝論云未有若今傳訓章句明為傳訓以來始辨章句或毛氏即題或在其後人未能審也

序葛覃后妃之本也后妃在父母家則志在於女功之事躬儉節用服澣濯之衣尊敬師傅則可以歸安父母化天下以婦道也箋躬儉節用由於師傅之教

而後言尊敬師傅者欲見其性亦自然可以歸安父

母言嫁而得意猶不忘孝音義

覃本亦作蕁徒南反延也澣本又作浣户

管反濯直角反傅夫附反見賢遍反

疏正義曰作葛覃詩者言后妃之本性也謂貞專節儉自有性也

敘又申說之后妃先在父母之家則已專志於女功之事復能身自儉約謹節財用服此澣濯之衣而尊敬師傅在家本有此性出嫁脩而不改婦禮無愆當於夫氏則可以歸問安否於父母化天下以為婦之道也定本后妃在父母家無之字化天下以婦道無成字有者衍也先言后妃在父母家者欲明尊敬師傅皆后妃在家時事說其為本之意言在父母之家者首章是也志在女功之事者二章治葛以為締綌澣濯即是節儉用服澣濯之衣者卒章汙私澣衣是也是也躬儉節用服澣濯之衣者卒章汙私澣衣是也澣濯即是節儉分為二者見由躬儉節用故能服此澣濯之衣也尊敬師傅卒章上一句歸寧父母是也可以歸安父母者即卒章下一句歸寧父母是也化天下以婦道者因事生義於經無所當也經言汙私澣衣在言歸之下則是在夫家之事也敘言躬儉節用謂在父母之家者見其在家已然出嫁不改也箋正義曰箋知躬儉節用由於師傅之教者以經汙私

潞衣在言告師氏之下故也歸寧父母乃是實事而言可以者能如此乃可以耳若不當夫氏雖歸安父母而父母尚憂今既當夫氏仍得歸安父母言其嫁而得夫之意猶不忘孝故也

葛之覃兮施于中谷維葉萋萋傳興也覃延也葛所以為締綌女功之事煩辱者施移也中谷谷中也萋萋茂盛貌箋云葛者婦人之所有事也此因葛之性以興焉興者葛延蔓于谷中喻女在父母之家形體浸浸日長大也葉萋萋然喻其容色茂盛黃鳥于飛集于灌木其鳴喈喈傳黃鳥搏黍也灌木叢木也喈喈和聲之遠聞

也箋云葛延蔓之時則搏黍飛鳴亦因以興焉飛集叢

木興女有嫁于君子之道和聲之遠聞興女有才美之

稱達於遠方音義

施毛以鼓反鄭如字下同蔓切兮反蔓音萬沒子鵲反長之丈反灌古亂

反喈音皆搏黍徒端反鳥名也叢才公反俗作藂疏正義一本作最作外反聞音問又如字下同稱尺證反疏義

曰言葛之漸長稍稍延蔓兮而移於谷中非直枝幹漸長維葉則萋萋然茂盛以興后妃之生浸浸日大而長

於父母之家非直形體日大其容色又美盛當此葛延蔓之時有黃鳥往飛集於叢木之上其鳴之聲音喈喈

然遠聞以興后妃形體既大宜往歸嫁於君子之家其才美之稱亦達於遠方也傳正義曰傳既云興也復言

葛所以為締綌者以下章說后妃治葛不為興欲見此章因事為興故箋中之云葛者婦人之所有事此因葛

之性以興焉是也采葛傳亦云葛所以為絺綌彼不為
因興亦言之者彼對蕭為祭祀父為療疾故也施移也
言引蔓移去其根也中谷谷中倒其言者古人之語皆
然詩文多此類也此言萋萋取未成之時喻女之少壯
故云茂盛貌下章指採用之時故以萋萋為成就貌也
箋正義曰以谷中是葛生之處故以谷中喻父母之家
枝莖猶形體故以葉比容色也王肅云葛生於此延蔓
於彼猶女之當外成也案下句黃鳥于飛喻女當嫁若
此句亦喻外成於文為重毛意必不然傳正義曰釋鳥
云皇黃鳥舍人曰皇名黃鳥郭璞曰俗呼黃離留亦名
搏黍陸璣疏云黃鳥黃鵬留也或謂之黃栗留幽州人
謂之黃鸝一名倉庚一名商庚一名鷺黃一名楚雀齊
人謂之搏黍當甚熟時來在桑間故里語曰黃栗留看
我麥黃甚熟亦是應節趁時之鳥也自此以下諸言黃
鳥倉庚皆是也釋木云灌木叢木又云木族生為灌孫
炎曰族叢也是灌為叢木也箋正義曰知葛當延蔓之

時搏黍飛鳴亦因以興者以前葛之生長是為因興則此亦宜然也言搏黍往飛集於灌木之時其鳴恒喈喈然其鳴喈喈然在集于灌木之下欲明總上于飛至集終始恒鳴以喻后妃在家與出嫁常有聲稱達於遠方也大明日大邦有子文王嘉止是先有才美之稱也飛集灌木鳥實往焉女嫁君子時實未嫁故言之道言雖有出嫁之理猶未也君子是夫之大名故詩於婦人稱夫多言君子也女子之名不出於閭才美之稱得達遠方者其名繫於父兄故大惟云大邦有子是也

葛之覃兮施于中谷維葉莫莫傳莫莫成就之貌箋云成就者其可采用之時是刈是漙為絺為綌服之無斁傳漙漙之也精曰絺靡曰綌斁厭也古者王后織玄纁

公侯夫人紘緹卿之內子大帶大夫命婦成祭服士妻朝服庶士以下各衣其夫箋云服整也女在父母之家

未知將所適故習之以締紕煩辱之事乃能整治之無

厭倦是其性貞專音義

莫美博反刈魚廢反韓詩云刈取也獲胡郭反韓詩云獲淪也

音羊灼反締耻知反葛之精者曰締紕去逆反數本亦作獸音亦厭於艷反紕都覽反紕織五采如縮狀用縣

填也紘獲耕反纓之無綏者從下仰屬於冠緹音延冕上覆也朝直遙反下同庶士謂庶人在官者本或作庶

人衣於既反

疏正義曰言葛之漸延蔓兮所移在於谷中生長不已其葉則莫莫然成就葛既成就已可

采用故后妃於是刈取之於是獲蕢之蕢治已訖后妃乃緝績之為締為紕言后妃整治此葛以為締紕之時

志無厭倦是后妃之性貞專也傳正義曰釋訓云是刈是穫獲者之也舍人曰是刈刈取之是穫獲者治之孫炎曰煮蒿以為絺綌以煮之於獲故曰獲煮非訓獲為煮曲禮云為天子削爪中以絺綌侯內以綌玉藻云浴用二巾上絺下綌皆貴絺而賤綌是絺精而綌麤故云精曰絺綌曰綌數厭釋詁文彼數作射音義同自王后織之故著箋云人君五色則天子之統五色獨言玄者以玄為尊故舉以言焉絃者纓之無綏從下而上者也祭義曰天子冕而朱紘諸侯冕而青紘此諸侯當以青為組在冕下仰屬之故士冠禮注云有笄者當組為紘垂為飾無笄者纓而結其條是也紘者冕上覆論語注云績麻三十升以為冕夏官弁師注云紘冕上覆玄表纁裏是也內子卿之適妻僖二十四年左傳趙姬請以叔隗為內子而已下之是大帶者玉藻所云大夫以玄華華黃也以素為帶飾之外以玄內以黃也大夫命婦

成祭服者大夫助祭服玄冕受之於君故大宗伯再命受服是也妻所成者自祭之服少牢禮朝服玄冠緇布衣素裳韋昭云祭服玄衣纁裳謂作玄冕之服非也士妻朝服者作朝於君服亦玄冠緇衣素裳也庶士以下各衣其夫庶士謂庶人在官者故祭法曰官師一廟庶士庶人無廟注云官師中士下士庶士府史之屬庶士與朝服異文則亦府史之屬韋昭云下士非也此庶士下至庶人其妻各衣其夫則夫之所服妻悉為之也彼文云公侯之夫人加以紵紵也則為紵又為紵紵也則士之妻加以以朝服則為祭服又為朝服皆下庶上則貴者所為少賤者所為多故庶士以下夫衣悉為之傳引此者以王后庶人之妻皆有所作后妃在父母之家未知將所適雖葛之煩辱亦治之也定本云王后織玄紵公侯夫人紵紵卿之內子大帶俗本王后下有親字紵紵大帶上有織字皆衍也箋正義曰服整釋言文也以女在父母之家未知將何所適不知為作王后為

作士妻故習之以締綰勞辱之事
尚能整治之無厭倦是其性貞專

言告師氏言告言歸傳言我也師女師也古者女師教
以婦德婦言婦容婦功祖廟未毀教于公宮三月祖廟
既毀教于宗室婦人謂嫁曰歸箋云我告師氏者我見
教告于女師也教告我以適人之道重言我者尊重師
教也公宮宗室於族人皆為貴薄汙我私薄澣我衣傳
汙煩也私燕服也婦人有副褱盛飾以朝事舅姑接見
于宗廟進見于君子其餘則私也箋云煩煩摺之用功

深澣謂濯之耳衣謂禕衣以下至祿衣害澣害否歸寧

父母傳害何也私服宜澣公服宜否寧安也父母在則

有時歸寧耳箋云我之衣服今者何所當澣乎何所當

否乎言常自潔清以事君子音義

謂嫁曰歸本亦無曰字此依公羊傳文重

直用反汙音烏副如字婦人首飾之上禕音輝王后六服一曰禕衣見賢遍反捫諸詮之音而專反何脣沈重

皆而純反阮孝緒字略云煩捫猶接莎也接音奴未反莎音素未反祿吐亂反六服之最下者害戶葛反與曷

同否方九反清如字沈音淨

疏正義曰毛以為上下二我其身中我其師后妃言我身本見教告於

師氏我師氏告我以歸嫁人之道欲令我躬儉節用不務鮮華故今日薄欲煩捫我之私服薄欲澣濯我之襲

衣然我之衣服有公有私議量而言我之衣服何者當見澣乎私服宜澣之何者當不澣乎公服宜否既以受師教誨澣衣節儉復以時歸寧父母鄭下三句為異言師氏告我欲令節儉故已今薄欲煩憫其私服薄欲澣濯其公衣所以公服私服竝澣之者即云同是我之衣服知何所當見澣乎何所當見否乎私服公衣皆悉澣之由已常自潔清以事君子故也衣裳既澣身復潔清故當以時歸寧父母耳傳正義曰言我釋詁文女師者教女之師以婦人為之昏禮云姆纁笄綃衣在其右注云姆婦人五十無子出而不復嫁能以婦道教人者若今時乳母矣鄭知女師之母必是無子而出者以女已出嫁母尚隨之又襄三十年公羊傳曰宋災伯姬存焉傳至母未至逮火而死若非出而不嫁何以得隨女在夫家若非無子而出犯其餘六出之道則身自無禮何能教人故知然也母既如此傳亦宜然南山箋云姜與姪娣及傳姆同處襄公不宜往雙之則傳亦婦人也何

休云選老夫為傅大夫妻為母禮重男女之別大夫
不宜教女子大夫之妻當從夫氏不當隨女而適人事
無所出其言非也此師教女之人內則云大夫以上立
師慈保三母者謂子之初生保養教視男女竝有三母
此女師教以婦德婦言婦容婦功皆昏義文也彼注云
婦德貞順婦言辭令婦容婉婉婦功絲枲天官九嫔職
注亦然二注皆以婉婉為婦容內則注云婉謂言語也
婉之言媚也媚謂容貌也分婉婉為二者欲以內則之
文充四德若不分婉為言語則無辭令之事且婉謂婉
順得為言語之婉順亦為容貌之婉媚故分之也既有
其德慎辭以出之容貌以表之女功而就業故如此次
也祖廟未毀教于公宮三月祖廟既毀教于宗室昏禮
文也彼注云祖廟女高祖為君者之廟以有緦麻之親
就尊者之宮教之則祖廟未毀與天子諸侯共高祖者
則在天子諸侯女宮中教之三月知在女宮者以莊元
年公羊傳曰羣公子之舍則以卑矣是諸侯之女有別

宮矣明五屬之內女就教可知彼注又云宗室大宗子之家則大宗者繼別為大宗百世不遷者其族雖五屬外與之同承別子者皆臨嫁三月就宗子女宮教成之知宗子亦有女宮者內則云命士以上父子皆異宮則女子亦別宮故曲禮曰非有大故不入其門是也若宗子未為命士教在宗子之家耳傳引此者以言女師教歸嫁之道故引此以證所教之處此後妃華國之長女而引族人之事者取配成文且明諸侯之女嫁前三月亦教之也女子自少及長常皆教習故內則云女子十年不出傳姆教之但嫁前三月特就尊者之宮教成之年婦人謂嫁曰歸隱二年公羊傳文定本歸上無曰字汙汙相對則汙亦汙名以汙汙垢者汙而用功深故因以汙為汙私服之名耳言汙煩者謂汙垢衣者用功煩多亦以煩為汙名故變云煩煩澗之用功深是也但毛以公服不汙唯汙私衣故一事分為二句上句言汙見用功深也下句言汙見其總名亦為汙又上句言私見

其燕褻下句言衣見其總名亦為衣故王肅述毛荅之
云煩擗澣濯其私衣是也言私燕服謂六服之外常著
之服則有汙垢故須澣公服則無垢汙矣故下傳云私
服宜澣公服宜否也副者首服之尊禕衣六服之首王
后之上服故言婦人有副禕盛飾既舉服之尊者然後
歷陳其事言此皆是公衣不謂諸事皆服禕衣也毛之
六服所施不明內司服注鄭云禕衣從王祭先王禴翟
祭先公闕翟祭羣小祀鞠衣以告桑展衣以禮見王及
賓客祿衣以御于王不言朝舅姑之服今傳既云婦人
有副禕盛飾即云以朝事舅姑則以禕衣朝舅姑矣知
者以特牲云士妻祭用纁笄綃衣而士昏禮云纁笄綃
衣見於舅姑是朝舅姑助祭其服同也王后禕衣以祭
先王明朝事舅姑亦服之矣檀弓云婦人不飾不敢見
舅姑將有四方之賓來褻衣何為陳於斯似朝舅姑與
見四方賓同服展衣者彼以大夫之妻賓客有尊於舅
姑者王后則賓客無與舅姑敵者朝事舅姑得申上服

也王后而得有舅者因姑以協句且詩者設言耳文王稱王之時大似老矣不必有父母可歸寧何但無舅姑也接見于宗廟謂以助祭用禕衣也進見於君子義與鄭同朝于王則展衣御于王則祿衣二者同名為進見也云其餘則私明自展祿以上為公衣矣但舉終始以言之明禕翟闕翟鞠衣亦在可知也或以進見君子文承副禕之下則皆以副禕也其餘則私謂禕翟以下知不然者以其臣朝君不過朝服助祭乃用冕后不宜用祭服以朝王若其餘則私謂禕翟以下則禕翟當澣君子偕老傳曰禕翟闕翟羽飾衣也以羽飾衣何由可澣又傳言私燕服若禕翟闕翟乃助祭之衣不得為燕褻之服也以此知毛言進見於君子非副禕也上舉禕衣之名下言展祿之事明六服皆為公衣其餘則為私也六服之外唯有纁笄綃衣耳箋正義曰鄭以私謂燕服衣謂公衣故云衣謂禕衣以下至祿衣以明六服非私也言煩煩澣之用功深澣謂濯之言其用功淺也此以

公對私為深淺耳若據潯中又有深淺潯深於漱故內則注云手曰漱足曰潯以內則冠帶言漱衣裳言潯故漱又淺於潯散而言之皆通以此經言汙序總之云潯濯之衣此六服明手濯不足潯也曲禮曰諸母不漱裳裳乃褻服宜煩擗之而言漱是皆通稱也傳正義曰父母在則有時歸寧耳者此謂諸侯夫人及王后之法春秋莊二十七年杞伯姬來左傳曰凡諸侯之女歸寧曰來是父母在得歸寧也父母既沒則使卿寧於兄弟襄十二年左傳曰楚司馬子庚聘于秦為夫人寧禮也是父母沒不得歸寧也泉水有義不得往載馳許人不嘉皆為此也若卿大夫之妻父母既沒猶得歸寧喪服傳曰為昆弟之為父後者何以亦期也婦人雖在外必有歸宗言父母雖沒有時來歸故不降為父後者謂大夫以下也故鄭志答趙商云婦人有歸宗謂自其家之為宗者大夫稱家言大夫如此耳夫人王后則不然也天子諸侯位高恐其專恣淫亂故父母既沒禁其歸寧大

夫以下位卑畏威故許之耳箋正義曰以言害澣害否明其無所偏否故知公私皆澣常自潔清也若如傳言私服宜澣公服宜否則經之害澣害否乃是問辭下無總結殆非文勢也豈詩人設問待毛傳答以足之哉且上言汙私澣衣衣私別文明其異也私為私服明衣是公衣衣澣私汙無不澣之事故知公私皆澣所以不從傳也若然三狄之服刻繒為形而畫以五色所以得澣者言公服有澣者耳不必六服皆澣也三狄不可澣展祿純色之衣得澣之也

葛覃三章章六句

序卷耳后妃之志也又當輔佐君子求賢審官知臣下之勤勞內有進賢之志而無險詖私謁之心朝夕

思念至於憂勤也箋謁請也音義

卷春勉反卷耳苓耳也廣雅云象耳

也郭云亦曰胡象江南呼常象草木疏云幽州人謂之爵耳誠彼寄反妄加人以罪也崔云險詖不正也

疏正義曰作卷耳詩者言后妃之志也后妃非直憂在進賢躬率婦道又當輔佐君子其志欲令君子

求賢德之人審置於官位復知臣下出使之勤勞欲令君子賞勞之內有進賢人之心唯有德是用而無

險詖不正私請用其親戚之心又朝夕思此欲此君子官賢人乃至於憂思而成勤此是后妃之志也言

又者繫前之辭雖則異篇而同是一人之事故言又為亞次也輔佐君子總辭也求賢審官至於憂勤皆

是輔佐君子之事君子所專后妃志意如然故云后妃之志也險詖者情實不正譽惡為善之辭也私謁

者婦人有寵多私薦親戚故厲王以艷妻方嬪七子在朝成湯謝過婦謁盛與險詖私謁是婦人之常態

聖人猶恐不免后妃能無此心故美之也至於憂勤
勤為勞心憂深不已至於勞勤后妃之篤志也至於
憂勤即首章上二句是也求賢審官即首章下二句
是也經敘倒者敘見后妃求賢而憂勤故先言求賢
經主美后妃之志能為此憂勤故先言其憂也

采采卷耳不盈頃筐傳憂者之興也采采事采之也卷

耳苓耳也頃筐畚屬易盈之器也箋云器之易盈而不

盈者志在輔佐君子憂思深也嗟我懷人寘彼周行傳

懷思寘置行列也思君子官賢人置周之列位箋云周

之列位謂朝廷臣也音義

頃音傾筐起反韓詩云頃
筐欵筐也苓音零畚音本何

休云草器也說文同易以鼓反下同思息吏反下
憂思同寘之鼓反行尸康反下注同朝直遙反疏正義

曰言有人事采此卷耳之菜不能滿此頃筐頃筐易盈
之器而不能滿者由此人志有所念憂思不在於此故
也此采菜之人憂念之深矣以興后妃志在輔佐君子
欲其官賢賞勞朝夕思念至於憂勤其憂思深遠亦如
采菜之人也此后妃之憂為何事言后妃嗟吁而嘆我
思君子官賢人欲令君子置此賢人於彼周之列位以
為朝廷臣也我者后妃自我也下箋云我我使臣我我
君此不解者以詩主美后妃故不特言也言彼者后妃
主求賢人為故此故以周行為彼也傳正義曰不云興也
而云憂者之興明有異於餘興也餘興言采菜即取采
菜喻言生長即以生長喻此言采菜而取憂為興故特
言憂者之興言興取其憂而已不取其采菜也言事采
之者言勤事采此菜也此與采芣俱言采采彼傳云非
一辭與此不同者此取憂為興言勤事采菜尚不盈筐

言其憂之極故云事采之彼以婦人樂有子明其采者
衆故云非一辭其實采采之義同故鄭志答張逸云事
謂事事一一用意之事采采亦然雖說異義則同是也
然則此謂一人之身念采非一彼采采謂采人衆多非
一故鄭云義則同也卷耳苓耳釋草文郭璞曰廣雅云
采耳亦云胡泉江東呼常泉或曰苓耳形似鼠耳叢生
似盤陸璣疏云葉青白色似胡荽白華細莖蔓生可煮
為茹滑而少味四月中生子如婦人耳中璫今或謂之
耳璫幽州人謂之爵耳是也言頃筐畚屬者說文云畚
草器所以盛種此頃筐可盛菜故言畚屬以曉人也言
易盈之器者明此器易盈自有所憂不能盈耳解以不
盈為喻之意也箋正義曰知周之列位謂朝廷臣也者
以其言周行是周之列位周是后妃之朝故知官人是
朝廷臣也襄十五年傳引詩曰嗟我懷人寔彼周行能
官人也王及公侯伯子男采衛大夫各居其列所謂周
行也彼非朝廷臣亦言周行者傳證楚能官人引詩斷

章故不
與此同

陟彼崔嵬我馬虺隤傳陟升也崔嵬土山之戴石者虺
隤病也箋云我我使臣也臣以兵役之事行出離其列
位身勤勞於山險而馬又病君子宜知其然我姑酌彼
金罍維以不永懷傳姑且也人君黃金罍永長也箋云
我我君也臣出使功成而反君且當設饗燕之禮與之

飲酒以勞之我則以是不復長憂思也言且者君賞功

臣或多於此音義

崔祖回反嵬五回反虺呼回反徐呼
懷反說文作瘼隤徒回反徐徒壞反

孫炎云馬退不能升之病也說文作頽使色吏反下同
離力智反姑如字說文作𠂔音同云秦以市買多得為
𠂔𠂔盧回反酒罇也韓詩云天子以玉飾諸侯大夫皆
以黃金飾士以梓禮記云夏曰山罍其形似壺容一斛
刻而畫之為雲雷之形疏正義曰后妃言我升彼崔嵬
以勞力到反復扶富反疏山顛之上者我使臣也我使
臣以兵役之事行出離其列位在於山險身已勤苦矣
其馬又虺隤而病我之君子當宜知其然若其還也我
君子且酌彼金罍之酒饗燕以勞之我則維以此之故
不復長憂思矣我所以憂思恐君子不知之耳君子知
之故不復憂也傳正義曰釋山云石戴土謂之崔嵬孫
炎曰石山上有土者又云土戴石為𡵓孫炎云土山上
有石者此及下傳云石山戴土曰𡵓與爾雅正反者或
傳寫誤也釋詁云虺隤玄黃病也孫炎曰虺隤馬罷不
能升高之病玄黃馬更黃色之病然則虺隤者病之狀
玄黃者病之變色二章互言之也箋正義曰我我使臣

者序云知臣下之勤勞故知使臣也定本云我我臣也
無使字言勤勞故知兵役之事事莫勞於兵役故舉其
尤苦而言之其實聘使之勞亦閔念之四牡之篇是其
事也言君子宜知其然謂未還宜知之還則宜賞之故
上句欲君子知其勞下句欲君子加其賞也傳正義曰
人君黃金罍此無文也故異義罍制韓詩說金罍大夫
器也天子以玉諸侯大夫皆以金士以梓毛詩說金罍
酒器也諸臣之所酢人君以黃金飾尊大一碩金飾龜
目蓋刻為雲雷之象謹案韓詩說天子以玉經無明文
謂之罍者取象雲雷博施如人君下及諸臣又司尊彝
云皆有罍諸臣之所酢注云罍亦刻而畫之為山雲之
形言刻畫則用木矣故禮圖依制度云刻木為之韓詩
說言士以梓士無飾言其木體則以上同用梓而加飾
耳毛說言大一碩禮圖亦云大一斛則大小之制尊卑
同也雖尊卑飾異皆得畫雲雷之形以其名罍取於雲
雷故也毛詩說諸臣之所酢與周禮文同則人君黃金

壘謂天子也周南王者之風故皆以天子之事言馬箋正義曰我我君者以后妃有其志耳事不敢專故知所勞臣者君也言臣出使功成而反者聘義云使者聘而誤主君不親饗明功不成不勞之也將率之敗非徒無賞亦自有罪故知功成而反也設饗燕之禮者以經云金壘兕觥皆陳酒事與臣飲酒唯饗燕耳言且者君賞功臣或多於此言或當更有賞賜非徒饗燕而已僖三十三年卻缺獲白狄子受一命之服宣十五年荀林父滅潞晉侯賜以千室之邑是其多也

陟彼高岡我馬玄黃我姑酌彼兕觥維以不永傷傳山脊曰岡玄馬病則黃兕觥角爵也傷思也箋云此章為意不盡申殷勤也觥罰爵也饗燕所以有之者飲酒禮

自立司正之後旅醵必有醉而失禮者罰之亦所以為

樂音義

周古康反兕徐履反觥古橫反以兕角為之韓詩云容五升禮圖云容七升為意于偽反殷勤

竝如字俗本下竝疏傳正義曰釋山云山脊岡孫炎曰加心非也樂音洛長山之脊也釋獸云兕似牛郭璞

曰一角青色重千斤者以其言兕必以兕角為之觥者爵稱也爵總名故云角爵也箋正義曰詩本畜志發憤

情寄於辭故有意不盡重章以申殷勤詩之初始有此故解之傳云兕觥角爵言其體此言觥罰爵解其用言

兕表用角言觥顯其罰二者相接也異義韓詩說一升曰爵爵盡也足也二升曰觥觥寡也飲當寡少三升曰

解解適也飲當自適也四升曰角角觸也不能自適觸罪過也五升曰散散訕也飲不自節為人謗訕總名曰

爵其實曰觴觴者餉也觥亦五升所以罰不敬觥廓也所以著明之貌君子有過廓然著明非所以餉不得名

觥毛詩說觥大七升許慎謹案觥罰有過一飲而盡七升為過多由此言之則觥是觚觚角散之外別有此器故禮器曰宗廟之祭賁者獻以爵賤者獻以散尊者舉觥卑者舉角特牲二爵二觚四觥一角一散不言觥之所用是正禮無觥不在五爵之例禮圖云觥大七升以兕角為之先師說云刻木為之形似兕角蓋無兕者用木也知觥必以罰者地官閭胥掌其比觥撻罰之事注云觥撻者失禮之罰也觥用酒具爵以兕角為之春官小胥職亦云觥其不敬者是以觥罰人之義也故秦彪絲衣皆云兕觥其觥明為罰而不犯矣饗燕之禮有兕觥者以饗燕之禮立司正之後旅醕無算必有醉而失禮者以觥罰之亦所以為樂也然則此后妃志使君勞臣宜是賢者不應失禮而用觥者禮法饗燕須設之耳不謂即以罰人也知饗有觥者七月云朋酒斯饗稱彼兕觥成十四年左傳衛侯饗苦成叔寤惠子引詩云兕觥其觥旨酒思柔故知饗有觥也饗以訓恭儉不應醉

而用觥者饗禮之初示敬故酒清而不敢飲肉乾而不敢食其末亦如燕法鄉飲酒大夫之饗禮亦有旅醕無算爵則饗末亦有旅醕恐其失禮故用觥也知燕亦有觥者昭元年左傳鄭人燕趙孟穆叔子皮及曹大夫與拜舉兕爵是燕有兕觥也鄉飲酒禮無觥者說行禮不言其有過之事故也又知用觥在立司正之後者燕禮立射人為司正之後乃云北而命大夫君曰以我安卿大夫皆對曰諾敢不安又曰賓反入及卿大夫皆脫屣升就席公以賓及卿大夫皆坐乃安又司正升受命君曰無不醉賓及卿大夫皆興對曰諾敢不醉以此言之立司正之後君命安賓又升堂皆坐命之無不醉於此以後恐其失禮故知宜有觥也

陟彼俎矣我馬瘠矣我僕痛矣云何吁矣傳石山戴土曰俎瘠病也痛亦病也吁憂也箋云此章言臣既勤勞

於外僕馬皆病而今云何乎其亦憂矣深閔之辭音義
殂七餘反瘡音塗本又作屠非痛音疏傳正義曰釋詁
數又普烏反本又作鋪同吁香于反疏云痛瘡病也孫
炎曰痛人疲不能行之病
瘡馬疲不能進之病也

卷耳四章章四句

序樛木后妃逮下也言能逮下而無嫉妬之心焉箋

后妃能和諧衆妾不嫉妬其容貌恒以善言逮下而

安之音義

樛居蚪反木下句曰樛字林九綱反馬融

料為木高逮徒戴反又徒帝反崔疏正義曰作樛木
集注本此序有鄭注檢衆本竝無疏詩者言后妃能

以恩意接及其下衆妾使俱以進御於王也后妃所以能恩意逮下者而無嫉妬之心焉定本焉作也逮下者三章章首二句是也既能逮下則樂其君子安之福祿是由於逮下故也

南有樛木葛藟纍之傳興也南南土也木下曲曰樛南土之葛藟茂盛箋云木枝以下垂之故故葛也藟也得纍而蔓之而上下俱盛興者喻后妃能以恩意下逮衆妾使得其次序則衆妾上附事之而禮義亦俱盛南土謂荆揚之域樂只君子福履綏之傳履祿綏安也箋云妃妾以禮義相與和合又能以禮樂樂其君子使為福

欽定四庫全書

卷一

祿所安音義

萬本亦作鼎力軌反似葛之草也草木疏云一名巨荻似燕萁亦連蔓葉似艾白色

其子亦可食力追反纏繞也本又作縈上附時掌反只之氏反猶是也綏音雖樂樂上音岳下音洛疏

傳正義曰諸言南山者皆據其國內故傳云周南山曹南山也今此穆木言南不必已國何者以興必取象以

興后妃上下之盛宜取木之盛者木盛莫如南土故言南土也下曲曰穆者釋木文藟與葛異亦葛之類也陸

璣云藟一名巨荻似燕萁亦延蔓生葉艾白色其子赤亦可食酢而不美是也箋正義曰箋知取上下俱盛者

以下云樂只君子據后妃與衆妾則此經非直興下逮而已又興其上下相與有禮義可以樂君子故知取上

下俱盛以喻后妃能以恩意下逮衆妾令之次敘進御使得其所則衆妾上親附而事之尊卑有敘禮義亦俱

盛也又解傳言南土之處謂荊州揚州之域知者禹貢淮海惟揚州厥木惟喬厥草惟夭是揚州草木美茂也

又周官正南曰荊州又曰東南曰揚州二州境界接連故皆有江漢俱宜稻麥則生草木大同又荊州在正南此言南土故以為荊揚也此南與下南有喬木同彼喬木與厥木惟喬亦同據荊揚矣彼注不言從此可知若然下傳南方之木美喬而上竦則非葛藟所能延言樛木者木種非一皆以地勢之美或下垂或上竦也定本云妃妾以禮義相與不作后妃字於義是也言又能以禮樂樂其君子者妃妾相與既有禮義又以此禮義施於君子所以言又也所以得樂君子者以內和而家治則天下化之四方感德樂事文王而此為福祿所安也南山有臺箋云只之言是則此只亦為是此箋云樂其君子猶言樂是君子矣祭統曰福者富也大順之顯名孝經援神契云祿者錄也取上所以敬錄接下下所以謹錄事上堯典曰天祿永終及此以樂君子皆謂保王位為福祿天保云降爾遐福天下普蒙則下民遇善時亦曰福祿故正月云民今之無祿是福祿之言無定分

矣福履將之毛以為福祿所
大鄭以為福祿之所扶助

南有樛木葛藟荒之樂只君子福履將之傳荒奄將大
也箋云此章申殷勤之意將猶扶助也

南有樛木葛藟縈之樂只君子福履成之傳縈旋也成

就也音義縈烏營反
說文作縈

樛木三章章四句

序螽斯后妃子孫衆多也言若螽斯不妬忌則子孫

衆多也箋忌有所諱惡於人音義

螽音終斯爾雅作
螽音同惡烏路反

疏

正義曰此不妬忌得子孫衆多者以其不妬忌則嬪妾俱進所生亦后妃之子孫故得衆多也思齊

云大姒嗣徽音則百斯男傳云大姒十子衆妾則宜百子是也王章皆言后妃不妬忌子孫衆多既言其多因說其美言仁厚戒慎和集耳箋正義曰忌者人有勝己已則諱其不如惡其勝已故曰有所諱惡於人德是也此唯釋忌於義未盡故小星箋云以色曰妬以行曰忌故僖十年左傳說晉侯其言多忌是忌不謂色也嫉者色行俱有又取怨憎之名則又甚於妬忌也故此與樛木同論后妃前云無嫉妬之心此云不妬忌是為大同也又小星云無妬忌之行樛木云無嫉妬之心則嫉亦大同心之與行別外內之稱行為心使表裏一也本以色曰妬以行曰忌但後之作者妬亦兼行故云妬賢嫉能

螽斯羽詵詵兮傳螽斯蚣蝢也詵詵衆多也箋云凡物

欽定四庫全書

卷一

有陰陽情慾者無不妬忌維蚣蟥不耳各得受氣而生

子故能詵詵然衆多后妃之德能如是則亦宜然宜爾

子孫振振兮傳振振仁厚也箋云后妃之德寬容不嫉

妬則宜女之子孫使其無不仁厚音義

詵所中反說文作𠂔音同蚣栗

容反字林作蚣先凶反郭璞先工反許慎思弓反蟥栗

居反詐慎呂忱竝先呂反郭璞才與反案一名斯螽七

月詩云斯螽動股是也揚雄許慎皆云春黍草木疏云

幽州謂之春箕蝗類也長而青長股股鳴者也郭璞注

方言云江東呼為虻蟻此音竹白反蟻音極慾音疏正

欲諸詮之音論不耳本或作不然振音真女音汝疏義

曰螽斯之蟲不妬忌故諸蚣蟥皆共交接各各受氣而

生子故螽斯之羽詵詵然衆多以興后妃之身不妬忌

故令衆妾皆共進御各得受氣而生子故后妃子孫亦衆多也非直子多則又宜汝之子孫使之振振兮無不仁厚也此以螽斯之多喻后妃之子而言羽者螽斯羽蟲故舉羽以言多也傳正義曰此言螽斯七月云斯螽文雖顛倒其實一也故釋蟲云螽蟓蚘蟥舍人曰今所謂春黍也陸璣疏云幽州人謂之春箕春箕即春黍蝗類也長而青長角長股股鳴者也或謂似蝗而小班黑其股似琉璃又五月中以兩股相切作聲聞數十步是也此實興也傳不言興者鄭志答張逸云若此無人事實興也文義自解故不言之凡說不解者耳衆篇皆然是由其可解故傳不言興也傳言興也箋言興者喻言傳所興者欲以喻此事也興喻名異而實同或與傳興同而義異亦云興者喻標有梅之類也亦有興也不言興者或鄭不為興若厭浥行露之類或便文徑喻若綠衣之類或同興箋略不言喻者若邶風習習谷風之類也或疊傳之文若葛覃箋云興馬之類是也然有興也

不必要有興者而有興者必有興也亦有毛不言興自言興者若四月箋云興人為惡有漸是也或興喻竝不言直云猶亦若者雖大局有準而應機無定鄭云喻者喻猶曉也取事比方以曉人故謂之為喻也變正義曰昭十年左傳曰凡有血氣皆有爭心是有情慾者無不妬也序云若螽斯不妬忌則知唯蛇蟻不耳傳正義曰振振仁厚者言宜爾子孫明子孫皆化后妃能寬容故為仁厚即寬仁之義也麟趾殷其雷傳曰振振信厚者以麟趾序云雖衰世之公子皆信厚殷其雷其妻勸夫以義臣成君事亦信故皆以為信厚也變正義曰此止說后妃不妬衆妾得生子衆多而言孫者協句且孫則子所生生子衆則孫亦多矣此言后妃子孫仁厚然而有管蔡作亂者此詩人感論之據其仁厚者多耳

螽斯羽薨薨兮宜爾子孫繩繩兮傳薨薨衆多也繩繩

戒慎也音義

覺呼橫反

螽斯羽揖揖兮宜爾子孫螽斯兮傳揖揖會聚也螽斯

和集也音義

揖子入側立二反螽尺十反徐又直立反

螽斯三章章四句

序桃夭后妃之所致也不妬忌則男女以正婚姻以

時國無鰥民也箋老而無妻曰鰥音義

桃木名天於驕反說文作

桃云木少盛貌鰥古頑反

疏

正義曰作桃夭詩者后妃之所致也后妃內脩其化贊助君子致使天下

有禮昏娶不失其時故曰致也由后妃不妬忌則令天下男女以正年不過限昏姻以時行不踰月故周

南之國皆無鰥獨之民焉皆后妃之所致也此雖文王化使之然亦由后妃內贊之致故因上螽斯后妃不妬忌後言其所致也且言致從家至國亦自近致遠之辭也男女以正三章上二句是也昏姻以時下二句是也國無鰥民焉申述所致之美於經無所當也箋正義曰劉熙釋名云無妻曰鰥者愁悵不寐目恒鰥鰥然故其字從魚魚目不閉也無夫曰寡寡蹀也單獨之名鰥或作矜同蓋古今字異王制曰老而無妻謂之矜老而無夫謂之寡則鰥寡年老不復嫁娶之名也孝經注云丈夫六十無妻曰鰥婦人五十無夫曰寡也知如此為限者以內則云妾雖老年未滿五十必與五日之御則婦人五十不復御明不復嫁矣故知稱寡以此斷也士昏禮注云姆婦人年五十出而無子者亦出於此也本三十男二十女為昏婦人五十不嫁男子六十不復娶為鰥寡之限也巷伯傳曰吾聞男女不六十不間居謂婦人也內則曰

唯及七十同藏無間謂男子也此其差也白虎通云
鰥之言鰥鰥無所親則寡者少也言少匹對耳故鴻
鴈傳偏喪曰寡此其對例也婦人無稱鰥之文其男
子亦稱寡襄二十八年傳曰崔杼生成及彊而寡故
爾雅云無夫無婦竝謂之寡丈夫曰索婦人曰嫠又
許慎曰楚人謂寡婦為霜竝其異名也鰥寡之名以
老為稱其有不得及時為室家者亦同名焉即此無
鰥民謂年不過時過則謂之鰥故舜年三十不娶書
曰有鰥在下曰虞舜唐傳孔子曰舜父頑母嚚不見
室家之端故謂之鰥是三十不娶稱鰥也又何草不
黃云何人不矜尚從軍未老不早還見室家亦謂之
矜易大過九二老夫得其女妻無不利九五老婦得
其士夫無咎無譽彼鄭注云以丈夫年過娶二十之
女老婦年過嫁於三十之男皆得其子彼言老若容
男六十婦五十猶得嫁娶者禮宗子雖七十無無主
婦是年過可以改娶則婦人五十或可以更嫁者言

鰥寡據其不得嫁娶者耳傳言崔杼為寡則有子亦稱寡鰥寡據其困者多是無子故王制及周禮皆云天民之窮而無所告者傳以桃之天天言其少壯宜其室家為不踰時則上句言其年盛下句言嫁娶得時也但傳說昏嫁年月於此不著標有梅卒章傳曰三十之男二十之女不待禮會而行之謂期盡之法則男女以正謂男未三十女未二十也此三章皆言女得以年盛時行則女自十五至十九也女年既盛則男亦盛矣自二十至二十九也東門之楊傳曰男女失時不逮秋冬則秋冬嫁娶正時也言宜其室家無踰時則三章皆為秋冬時矣鄭以三十之男二十之女仲春之月為昏是禮之正法則三章皆上二句言婦人以年盛時行謂二十也下句言年時俱當謂行嫁又得仲春之正時也

桃之天天灼灼其華傳興也桃有華之盛者天天其少

壯也灼灼華之盛也箋云興者喻時婦人皆得以年盛
時行也之子于歸宜其室家傳之子嫁子也于往也宜
以有室家無踰時者箋云宜者謂男女年時俱當音義
少詩照反疏正義曰毛以為少壯之桃夭天然復有灼
當丁浪反灼然此桃之盛華以興有十五至十九少
壯之女亦天然復有灼灼之美色正於秋冬行嫁然
是此行嫁之子往歸嫁於夫正得善時宜其為室家矣
鄭唯據年月不同又宜者謂年時俱善為異傳正義曰
天天言桃之少灼灼言華之盛桃或少而未華或華而
不少此詩天天灼灼竝言之則是少而有華者故辨之
言桃有華之盛者由桃少故華盛以喻女少而色盛也
箋正義曰此言年盛時謂以年盛二十之時非時月之
時下云宜其室家乃據時月耳易傳者以既說女年之

盛又言之子于歸後言宜其室家
則總上之辭故以為年時俱當

桃之夭夭有蕢其實傳蕢實貌非但有華色又有婦德

之子于歸宜其家室傳家室猶室家也音義蕢淳雲反

桃之夭夭其葉蓁蓁傳蓁蓁至盛貌有色有德形體至

盛也之子于歸宜其家人傳一家之人盡以為宜箋云

家人猶室家也音義蓁側中反盡津忍反疏箋正義曰或如字他皆放此疏易傳者以

其與上相類同有宜其之文明據宜其為夫婦據其年
盛得時之美不宜橫為一家之人桓十八年左傳曰女

有家男有室室家謂夫婦也此云家人家猶夫也
猶婦也以異章而變文耳故云家人猶室家也

桃夭三章章四句

序兔置后妃之化也關雎之化行則莫不好德賢人

衆多也音義

兔他故反置音子斜反疏正義曰作兔說文子余反好呼報反置詩者言后

妃之化也言由后妃關雎之化行則天下之人莫不好德是故賢人衆多由賢人多故兔置之人猶能恭敬是后妃之化行也經三章皆言賢人衆多之事也經直陳兔置之人賢而云多者箋云置兔之人鄙賤之事猶能恭敬則是賢人衆多是舉微以見著也桃夭言后妃之所致此言后妃之化榮萇言后妃之美此三章所美如一而設文不同者以桃夭承螽斯之後螽斯以前皆后妃身事桃夭則論天下昏姻得時為自近及遠之辭故云所致也此兔置又承其後已在致限故變言之化明后妃化之使然也榮萇以后

妃事終故總言之美其實三者義通皆是化美所以致也又上言不妬忌此言關雎之化行不同者以挑天說昏姻男女故言不妬忌此說賢人衆多以關雎求賢之事故言關雎之化行榮莒則婦人樂有子故云和平序者隨義立文其實總上五篇致此三篇

肅肅兔置掾之丁丁傳肅肅敬也兔置兔罟也丁丁掾杙聲也箋云置兔之人鄙賤之事猶能恭敬則是賢者衆多也趙趙武夫公侯干城傳趙趙武貌干扞也箋云干也城也皆以禦難也此置兔之人賢者也有武力可任為將帥之德諸侯可任以國守扞城其民折衝禦難

於未然音義

桷陟角反丁陟耕反畧音古罔也杙本又作弋羊職反郭羊北反爾雅云檝謂之杙

李巡云

檝也檝音特檝音其月反赴居黝反爾雅云勇

也干如字孫炎云干楯所以自蔽扞也舊戶旦反沈音

幹扞戶旦反禦魚呂反難乃旦反下同任音壬將子匠

反帥色類反沈所愧反可任而鵠反後不音者放此守

手又反折之設

疏正義曰毛以為肅肅然恭敬之人乃為兔作置身自桷杙其桷杙之聲丁

反衝昌容反

丁然雖為鄙賤之事甚能恭敬此人非直能自肅敬又

是赴然赴然威武之夫可以為公侯之扞城言可以蕃屏

公侯為之防固也鄭唯干城為異言此免置之人有赴

赴然威武之德公侯可任以國守令扞城其民使之折

衝禦難於未然也謂公侯使之與民作扞城也傳正義

曰肅肅敬也釋訓文此美其賢人衆多故為敬小星云

肅肅宵征故傳曰肅肅疾貌鵠羽鴻鴈說鳥飛文連其

羽故傳曰肅肅羽聲也泰苗說宮室箋云肅肅嚴正之

貌各隨文勢也釋器云兔罟謂之置李巡曰兔自作徑路張置捕之也釋宮云櫟謂之棧李巡曰棧謂繫也此丁丁連櫟之故知櫟聲故伐木傳亦云丁丁伐木聲干扞也釋言文孫炎曰干盾自蔽扞也下傳曰可以制斷公侯之腹心是公侯以為腹心則好仇者公侯自以為好匹干城者公侯自以為扞城言以武夫自固為扞蔽如盾為防守如城然箋正義曰箋以此武夫為扞城其民易傳者以其赴赴武夫論有武任明為民扞城可以禦難也言未然者謂未有來侵者來則折其衝禦其難也若使和好則此武夫亦能和好之故二章云公侯好仇

肅肅兔罟施于中逵傳逵九逵之道赴赴武夫公侯好仇箋云怨耦曰仇此置兔之人敵國有來侵伐者可使

和好之亦言賢也

音義施

如字達求龜反九達道也

疏

正義曰毛以為赳赳然有威武之夫有文有武能匹耦於公侯之志為公侯之好匹此雖無傳以毛仇皆為匹鄭唯好仇為異傳正義曰釋宮云一達謂之道路二達謂之岐旁郭氏云岐道旁出三達謂之劇旁孫炎云旁出岐多故曰劇四達謂之衢郭氏云交道四出五達謂之康孫炎云康樂也交會樂道也六達謂之莊孫氏云莊盛也道煩盛七達謂之劇驂孫氏云三道交復有一岐出者八達謂之崇期郭氏云四道交出九達謂之遠郭璞云四道交出復有旁通者莊二十八年左傳楚伐鄭入自純門及遠市杜預云遠竝九軌案周禮經塗九軌不名曰達杜意蓋以鄭之城內不應有九出之道故以為竝九軌於爾雅則不合也

肅肅兔置施于中林傳中林林中赳赳武夫公侯腹心

傳可以制斷公侯之腹心箋云此置免之人於行政伐

可用為策謀之臣使之慮無亦言賢也音義

施如字沈以豉反斷

丁亂疏正義曰毛以為免置之人有文有武可以為腹

反鄭以為此免置之人賢者若公侯行政伐時可使之為

腹心之計謀慮前事傳正義曰解武夫可為腹心之意

由能制斷公侯之腹心以能制治己之腹心臣之倚用

如己腹心箋正義曰箋以首章為禦難謂難未至而預

禦之二章為和好怨耦謂已被侵伐使和好之也皆是

用兵之事故知此腹心者謂行政伐又可以為策謀之

臣使之慮無也慮無者宣十二年左傳文也謀慮不意

之事也今所無不意有此即令謀之出其奇策也言用

策謀明自往攻伐非和好

好兩軍與二章異也

兔置三章章四句

序采芣后妃之美也和平則婦人樂有子矣箋天下

和政教平也音義

芣音浮芣本亦作苢音以韓詩云直曰車前瞿曰苢苢郭璞云江東

呼為蝦蟇衣草木疏云幽州人謂之牛舌又名當道其子治婦人生難本草云一名牛遺一名勝鳥山海經及周書王會皆云苢苢木也實似李食之宜子出於西戎衛氏傳及許慎竝同此王肅亦同王基已有駁難也疏正義曰若天下亂離兵役不息則我躬不鳥音昔閱於此之時宜思子也今天下和平於是婦人始樂有子矣經三章皆樂有子之事也定本和平上無天下二字據箋則有者誤也箋正義曰文王三分天下有其二言天下者以其稱王王必以天下之辭故騶虞序曰天下純被文王之化是也文王平

六州武王平天下事實平定唯不得言太平耳太平者王道大成圖瑞畢至故曰太平雖武王之時亦非太平也故論語曰武盡美矣未盡善也注云謂未致太平是也武王雖未太平平定天下四海貢職比於文王之世亦得假稱太平故魚麗傳魚藻箋皆云武王太平比於周公之時其實未太平也太平又名隆平隆平者亦據頌聲既作盛德之隆故嘉魚既醉維天之命序及詩譜皆言太平惟鄭康誥注云隆平已至中候序云帝舜隆平此要政治時和乃得稱也此三章皆再起采采之文明時婦人樂有子者衆故頻言采采見其采者多也六者互而相須首章言采之有之采者始往之辭有者已藏之稱總其終始也二章言采時之狀或掇拾之或將取之卒章言所盛之處或結之或頡之首章采之據初往至則掇之將之既得則結之頡之歸則有藏之於首章先言有之者欲急明婦人樂采而有子故與采之為對所以總終

始也六者本各見其一因相首尾以承其次耳擬
將事殊袷頤用別明非一人而為此六事而已

采采芣苢薄言采之傳采采非一辭也芣苢馬舄馬舄

車前也宜懷妊馬薄辭也采取也箋云薄言我薄也采

采芣苢薄言有之傳有藏之也疏傳正義曰芣苢馬舄

郭璞曰今車前草大葉長穗好生道邊江東呼為蝦蟆
衣陸璣疏云馬舄一名車前一名當道喜在牛跡中生
故曰車前當道也今藥中車前子是也幽州人謂之牛
舌草可嚙作茹大滑其子治婦人難產王肅引周書王
會云芣苢如李出於西戎王基駁云王會所記雜物奇
獸皆四夷遠國各貴土地異物以為貢贄非周南婦人
所得采是芣苢為馬舄之草非西戎之木也言宜懷妊
者即陸璣疏所云治難產是也箋正義曰毛傳言薄辭

故申之言我薄也我訓經言也薄還存其字是為辭也
言我薄者我薄欲如此於義無取故為語辭傳於薄汙
我私不釋者就此衆也時邁云薄言震之箋云薄猶甫
也甫始也有客曰薄言追之箋云王始言餞送之以薄
為始者以時邁下句云莫不震疊明上句薄言震之為
始動以威也有客前云以繫其馬欲留微子下云薄言
追之是時將行王始言餞送之詩之薄言
多矣唯此二者以薄為始餘皆為辭也

采采芣苢薄言掇之傳掇拾也采采芣苢薄言捋之傳

捋取也音義

掇都奪反一音知劣
反拾音十捋力活反

采采芣苢薄言結之傳結執衽也采采芣苢薄言禡之

傳捋衽曰禡音義

結音結衽入錦反又而鵠反
衣際也禡戶結反捋初洽反疏傳正
義曰

釋器云執衽謂之袂孫炎曰持衣上衽又云扱衽謂之
顧李巡曰扱衣上衽於帶衽者裳之下也置袂謂手執
之而不扱顧則
扱於帶中矣

采芣三章章四句

序漢廣德廣所及也文王之道被于南國美化行乎

江漢之域無思犯禮求而不可得也箋紂時淫風徧

於天下維江漢之域先受文王之教化音義

漢水名也尚書

云嵇冢導漾水東流為漢被皮義

疏正義曰作漢廣

反紂直九反殷王也徧邊見反詩者言德廣之
所及也言文王之道初致桃夭采芣之化今被於南
國美化行於江漢之域故男無思犯禮女求而不可

得此由德廣所及然也此與桃夭皆文王之化后妃
所贊於此言文王者因經陳江漢指言其處為遠辭
遂變后妃而言文王為遠近積漸之義故於此既言
德廣汝墳亦廣可知故直言云道化行耳此既言美
化下篇不嫌不美故直言文王之化不言美也言南國
則六州猶羔羊序云召南之國也彼言召南此不言
周南者以天子事廣故直言南彼論諸侯故止言召
南之國此無思犯禮求而不可得總序三章之義也
箋正義曰言先者以其餘三州未被文王之化故以
江漢之域為先被也定本先被作先受因經序有江
漢之文故言之耳其實六州共
被文王之化非江漢獨先也

南有喬木不可休息漢有游女不可求思傳興也南方
之木美喬上竦也思辭也漢上游女無求思者箋云不

可者本有可道也木以高其枝葉之故故人不得就而
止息也興者喻賢女雖出游流水之上人無欲求犯禮
者亦由貞潔使之然漢之廣矣不可泳思江之永矣不
可方思傳潛行為泳永長方泂也箋云漢也江也其欲
渡之者必有潛行乘泂之道今以廣長之故故不可也
又喻女之貞潔犯禮而徃將不至也音義喬本亦作橋渠驕反徐又
紀橋反休息竝如字古本皆爾本或作休思此以意改
爾竦栗勇反流水本或作漢水泳音詠泂芳于反亦作
潯又作桴或作桴竝同沈旋音附方言云泂謂之潯潯
謂之筏筏秦晉通語也孫炎注爾雅云方木置水為桴

棧也郭璞云水中蘗筏也又云木曰蘗竹曰筏小筏曰附蘗音皮佳反附筏同音伐樊光爾雅本作附疏
正義曰木所以庇蔭本有可息之道今南方有喬木以
上疎之故不可就而止息以興女以定情本有可求之
時今漢上有游女以貞潔之故不可犯禮而求是為木
以高其枝葉人無休息者女由持其潔清人無求思者
此言游女尚不可求則在室無敢犯禮可知也出者猶
能為貞處者自然尤潔又言水所以濟物本有泳思方
思之道今漢之廣闊矣江之永長矣不可潛行乘附以
求濟以興女皆貞潔矣不可犯禮而求思然則方泳以
渡江漢雖往而不可濟喻犯禮以思貞女雖求而將不
至是為女皆貞潔求而不可得故男子無思犯禮也定
本遊女作游傳正義曰思辭以泳思方思之等皆不取
思為義故為辭也經求思之文在游女之下傳解喬木
之下先言思辭然後始言漢上疑經休息之字作休息
也何則詩之大體韻在辭上疑休求字為韻二字俱作

思但未見如此之本不敢輒改耳內則云女子居內深
宮固門此漢有游女者內則言閨寺守之則貴家之女
也庶人之女則執筐行饁不得在室故有出游之事既
言不可求明人無求者定本喬上竦無木字箋正義曰
箋知此為本有可道者以此皆據男子之辭若恒不可
則不應發不可之辭故云本有可道也此箋與下箋互
也此直言不可者本有可道總解經不可之文遂略不
有可息之道箋下言渡江漢有潛行乘桴之道不釋不
可之文是其互也然本淫風大行之時女有可求今被
文王之化游女皆潔此云潔者本未必已淫興者取其
一象木可就蔭水可方泳猶女有可求今木以枝高不
可休息水以廣長不可求渡不得要言木本少時可息
水本一勺可渡也言木以高其枝葉解傳言上竦也言
女雖出游漢水之上者對不出不游者言無求犯禮者
謂男子無思犯禮由女貞潔使之然也所以女先貞而
男始息者以姦淫之事皆男倡而女和由禁嚴於女法

欽定四庫全書

卷一

緩於男故男見女不可求方始息其邪意召南之篇女既貞信尚有強暴之男是也傳正義曰潛行為泳釋水文郭璞曰水底行也晏子春秋曰潛行逆流百步順流七里永長釋詁文方附釋言文孫炎曰方水中為附筏也論語曰乘桴浮於海注云桴編竹木大曰楫小曰桴是也箋正義曰此江漢之深不可乘附而渡谷風云就其深矣方之舟之者雖深不長於江漢故也言將不至者雖求之女守禮將不肯至也

翹翹錯薪言刈其楚傳翹翹薪貌錯雜也箋云楚雜薪之中尤翹翹者我欲刈取之以喻衆女皆貞潔我又欲取其尤高潔者之子于歸言秣其馬傳秣養也六尺以上曰馬箋云之子是子也謙不敢斥其適已於是子之

嫁我願秣其馬致禮餽示有意焉漢之廣矣不可泳思

江之永矣不可方思音義

翹祁遙反沈其亮反尤高潔者一本無潔字秣莫葛反說

文云食馬穀也上時掌反下文同餽虛氣反牲腥曰餽

疏正義曰翹翹然而高者乃是雜薪此薪雖皆高

我欲刈其楚所以然者以楚在雜薪之中尤翹翹而高故也以興貞潔者乃是衆女此衆女雖皆貞潔我欲取

其尤貞潔者又言是其尤潔者之子若往歸嫁我欲以粟秣養其馬乘之以致禮餽示已有意欲求之下四句

同前傳正義曰翹翹高貌傳言薪貌者明薪之貌翹翹然若直云高貌恐施於楚最高者此翹翹連言錯薪故

為薪貌鴟鴞云予室翹翹即云風雨所漂搖故傳曰翹翹危也莊二十二年左傳引逸詩曰翹翹車乘即云招

我以弓明其遠故服虔云翹翹遠貌箋正義曰薪木稱故月令云收秩薪柴注云大者可析謂之薪下章萋草

亦云薪者因此通其文楚亦木名故學記注以楚為荆
王風鄭風竝云不流束楚皆是也言楚在雜薪之中尤
翹翹言尤明雜薪亦翹翹也釋訓云之子是子也李巡
曰之子者論五方之言是子也然則之為語助人言之
子者猶云是此子也桃夭傳云嫁子彼說嫁事為嫁者
之子此則貞潔者之子東山之子言其妻白華之子斥
幽王各隨其事而名之言謙不敢斥其適已謂云往嫁
若斥適已當言來歸所以桃夭鵲巢東山不為謙者不
自言已說他女嫁故不為謙也言致禮餽者昏禮下達
納采用鴈問名納吉皆如之納徵用玄纁束帛鴈皮是
士禮也媒氏云純帛無過五兩謂庶人禮也欲致禮謂
此也餽謂牲也昏禮不見用牲又鄭以時事言之或亦
宜有也言示有意者前已執謙不敢斥言其適已
言養馬是欲致禮餽示有意求之但謙不斥耳

翹翹錯薪言刈其萋傳萋草中之翹翹然之子于歸言

秣其駒傳五尺以上曰駒漢之廣矣不可泳思江之永

矣不可方思音義

萋力俱反馬云萋蒿也郭云似艾音力侯反

疏傳正義曰

是木此萋是草故言草中之翹翹然釋草云購萋舍人曰購一名萋郭云萋萋蒿也生下田初生可啖江東用羹魚也陸璣疏云其葉似艾白色長數寸高丈餘好生水邊及澤中正月根芽生旁莖正白生食之香而脆美其葉又可蒸為茹是也庾人云八尺以上為龍七尺以上為駉六尺以上為馬故上傳曰六尺以上曰馬此駒以次差之故知五尺以上也五尺以上即六尺以下故株林箋云六尺以下曰駒是也輶人注國馬謂種戎齊道高八尺田馬高七尺駕馬高六尺即庾人三等龍駉馬是也何休注公羊云七尺以上曰龍不合周禮也

漢廣三章章八句

序汝墳道化行也文王之化行乎汝墳之國婦人能

閔其君子猶勉之以正也箋言此婦人被文王之化

厚事其君子音義

墳符云反常武傳云墳涯也疏正義閔密謹反傷念也被皮義反

曰作汝墳詩者言道化行也文王之化行於汝墳之國婦人能閔念其君子猶復勸勉之以正義不可逃亡為文王道德之化行也知此道非言道之道者以諸欽言道者皆為言不為道耳上云德廣所及先德後道事之次也言汝墳之國以汝墳之佳表國所在猶江漢之域非國名也閔者情所憂念勉者勸之盡誠欲見情雖憂念猶能勸勉故先閔而後勉也臣奉君命不敢憚勞雖則勤苦無所逃避是臣之正道故

曰勉之以正也閔其君子首章二章是也勉之以正卒章是也定本能閔上無婦人二字

遵彼汝墳伐其條枚傳遵循也汝水名也墳大防也枚

曰條幹曰枚箋云伐薪於汝水之側非婦人之事以言

己之君子賢者而處勤勞之職亦非其事未見君子怒

如調飢傳怒飢意也調朝也箋云怒思也未見君子之

時如朝飢之思食音義

枚妹迴反怒乃歷反韓詩作懶音同調張留反又作調音同

疏

正義曰言大夫之妻身自循彼汝水大防之側伐其條枚枚幹之薪以為己伐薪汝水之側非婦人之事

因閔己之君子賢者而處勤勞之職亦非其事也既閔其勞遂思念其事言己未見君子之時我之思君子怒

然如朝飢之思食也墳大防釋丘文李廵曰墳謂厓岸狀
汝固知是水名也墳大防釋丘文李廵曰墳謂厓岸狀
如墳墓名大防也故常武傳曰墳厓大司徒注云水厓
曰墳則此墳謂汝水之側厓岸大防也若然釋水云水
自河出為灘江為沱別為小水之名又云江有沱河有
灘汝有瀆李廵曰江河汝旁有肥美之地名郭璞曰詩
云遵彼汝墳則郭意以此汝墳為瀆汝所分之處有美
地因謂之瀆箋傳不然者以彼瀆從水此墳從土且伐
薪宜於厓岸大防之上不宜在瀆汝之間故也枝曰條
幹曰枚無文也以枚非木則條亦非木明是枝幹相對
為名耳枝者木大不可伐其幹取條而已枚細者可以
全伐之也周禮有銜枚氏注云枚狀如箸是其小也終
南云有條有梅文與梅連則條亦木名也故傳曰條槠
與此異也下章言條肆肆餘也斬而復生是為餘也如
今藥生者亦非木名也襄二十九年左傳曰晉國不恤
宗周之闕而夏肆是屏又曰杞夏餘也是肆為復生之

餘箋正義曰知婦人自伐薪者以序云婦人能閔其君子則閔其君子者是汝墳之國婦人也經言遵彼汝墳故知婦人自伐薪也大夫之妻尊為命婦而伐薪者由世亂時勞君子不在猶非其宜故云非婦人之事婦人之事深宮固門紡績織紵之謂也不賢而勞是其常故以賢者處勤為非其事也釋詁云怒思也舍人曰怒志而不得之思也釋言云怒飢也李巡曰怒宿不食之飢也然則怒之為訓本為思耳但飢之思食意又怒然故又以為飢怒是飢之意非飢之狀故傳言飢意箋以為思義相接成也此連調飢為文故傳以為飢意小弁云怒焉如擣無飢事故箋直訓為思也此以思食比思夫故箋又云如朝飢之思食

遵彼汝墳伐其條肄傳肄餘也斬而復生曰肄既見君子不我遐棄傳既已遐達也箋云已見君子君子反也

于已反得見之知其不遠棄我而死亡於思則愈故下

章勉之音義

肄以自反沈云徐音以世反非復扶富反思如字又息嗣反

疏正義曰

棄猶云不遐棄我古之人語多倒詩之此類衆矣婦人以君子處勤勞之職恐避役死亡今思之覲君子事訖得反我既得見君子既知不遠棄我而死亡我於思則愈未見恐其逃亡既見知其不死故憂思愈也箋正義曰言不遠棄我我者婦人自謂也若君子死亡已不復得見為遠棄我今不死已得見之為不遠棄我也然君子或不堪其苦避役死亡或自思公義不避勞役不由於婦人然婦人閔夫之辭據婦人而言耳鄭知不直遠棄已而去知為王事死亡者以閔其勤勞豈為棄已而憂也下章云父母孔邇是勉勸之辭由此畏其死亡故下章勉之定本箋之下云已見君子君子反也於已反得見之俗本多不然

魴魚賴尾王室如燬傳賴赤也魚勞則尾赤燬火也箋
云君子仕於亂世其顏色瘦病如魚勞則尾赤所以然
者畏王室之酷烈是時紂存雖則如燬父母孔邇傳孔
甚邇近也箋云辟此勤勞之處或時得罪父母甚近當
念之以免於害不能為疏遠者計也音義魴符方反魚
說文作燬同燬音毀齊人謂火曰燬郭璞又音貨字書
作燬音燬說文同一音火尾反或云楚人名火曰燬齊
人曰燬吳人曰燬此方俗訛語也瘦色救反酷正義
苦毒反辟此一本作辭此處昌慮反為于偽反疏曰婦
人言魴魚勞則尾赤以興君子苦則容悴君子所以然
者由畏王室之酷烈猛熾如火故也既言君子之勤苦

即勉之言今王室之酷烈雖則如火當勉力從役無得
逃避若其避之或時得罪父母甚近當自思念以免於
害無得死亡罪及父母所謂勉之以正也傳正義曰釋
器云再染謂之賴郭云賴淺赤也魴魚之尾不赤故知
勞則尾赤哀十七年左傳曰如魚賴尾衡流而彷徨鄭
氏云魚肥則尾赤以喻蒯賁淫縱不同者此自魴魚尾
本不赤赤故為勞也鄭以為彼言彷徨為魚肥不指魚
名猶自有肥而尾赤者服氏亦為魚勞燬火釋言文也
李廵曰燬一名火孫炎曰方言有輕重故謂火為燬也
箋正義曰言君子仕於亂世不斥大夫士王肅云當紂
之時大夫行役王基云汝墳之大夫久而不歸樂詳馬
昭孔晁孫毓等皆云大夫則箋云仕於亂世是為大夫
矣若庶人之妻杜言我心傷悲伯兮則云甘心首疾
憂思皆在於情性豈有勸以德義恐其死亡若是乎序
稱勉之以正則非庶人之妻言賢者不宜勤勞則又非
為士周南召南述本大同而殷其需召南之大夫遠行

從政其妻勸以義此引父母之甚近傷王室之酷烈閔之則恐其死亡勉之則勸其盡節比之於殷其嚚志遠而義高大夫妻於是明矣雖王者之風見感文王之化但時實紂存文王率諸侯以事殷故汝墳之國大夫猶為殷紂所役若稱王以後則不復事紂六州文王所統不為紂役也箋以二南文王之事其衰惡之事舉紂以明之上漢廣云求而不可得本有可得之時言紂時淫風大行此云王室如燬言是時紂存行露云衰亂之俗微言紂末之時野有死麕云惡無禮言紂時之世麟趾有衰世之公子不言紂時法有詳略承此可知也

汝墳三章章四句

序麟之趾關雎之應也關雎之化行則天下無犯非禮雖衰世之公子皆信厚如麟趾之時也箋關雎之

時以麟為應後世雖衰猶存關雎之化者君之宗族

猶尚振振然有似麟應之時無以過也音義

麟呂辛反瑞獸

也草木疏云麋身牛尾馬足黃色員蹄一角角端有肉音中鍾呂行中規矩王者至仁則出服虔注左傳

云視明禮修則麒麟至麋音俱倫反序本或直云麟趾無之字應應對之應序注及下傳應禮同疏

正義曰此麟趾處末者有關雎之應也由后妃關雎之化行則令天下無犯非禮天下既不犯禮故今雖

衰世之公子皆能信厚如古致麟之時信厚無以過也關雎之化謂螽斯以前天下無犯非禮桃夭以後

也雖衰世之公子皆信厚如麟趾之時此篇三章是也此篇處末見相終始故壁序前篇以為此次既因

有麟名見若致然編之處末以法成功也此篇本意直美公子信厚似古致麟之時不為有關雎而應之

太師編之以象應敘者述以示法耳不然此豈一人作詩而得相顧以為終始也又使天下無犯非禮乃致公子信厚是公子難化於天下豈其然乎明是編之以為示法耳箋正義曰箋欲明時不致麟信厚似之故云關雎之時以麟為瑞後世雖衰謂紂時有文王之化至極之時以麟為瑞後世雖衰謂紂時有文王之教猶存關雎之化能使君之宗族振振然信厚如麟應之時無以過也信厚如麟時實不致麟故張逸問麟趾義云關雎之化則天下無犯非禮雖衰世之公子皆信厚其信厚如麟趾之時箋云喻今公子亦信厚與禮相應有似於麟唯於此二者時關雎之化致信厚未致麟答曰衰世者謂當文王與紂之時而周之盛德關雎化行之時公子化之皆信厚與禮合古太平致麟之時不能過也由此言之不致明矣鄭言古太平致麟之時者案中候握河記云帝軒題象麒麟在圃又唐傳云堯時麒麟在郊藪又孔叢云唐虞

之世麟鳳遊於田由此言之黃帝堯舜致麟矣然感應宜同所以俱行關雎之化而致否異者亦時勢之運殊古太平時行關雎之化至極能盡人之情能盡物之性太平化洽故以致麟文王之時殷紂尚存道未盡行四靈之瑞不能悉致序云衰世之公子明由衰故不致也成康之時天下太平亦應致麟但無文證無以言之孔子之時所以致麟者自為制作之應非化洽所致不可以難此也三章皆以麟為喻先言麟之趾次定次角者麟是走獸以足而至故先言趾因從下而上次見其額次見其角也同姓踈於同祖而先言姓者取其與定為韻故先言之

麟之趾振振公子傳興也趾足也麟信而應禮以足至者也振振信厚也箋云興者喻今公子亦信厚與禮相

應有似於麟于嗟麟兮傳于嗟歎辭音義

振音真相應音鷹當也

疏正義曰言古者麟之趾猶今之振振公子也麟之為獸屬信而應禮以喻今公子亦振振然信厚與禮相

應言公子信厚似於麟獸也即歎而美之故于嗟乎歎今公子信厚如麟兮言似古致麟之時今雖時不致麟

而信與之等反覆嗟歎所以深美之也傳正義曰傳解四靈多矣獨以麟為興意以麟於五常屬信為瑞則應

禮故以喻公子信厚而與禮相應也此直以麟比公子耳而必言趾者以麟是行獸以足而至故言麟之趾也

言信而應禮則與左氏說同以為修母致子也哀十四年左傳服虔注云視明禮修而麟至思睿信立白虎擾

言從又成則神龜在沼聽聰知正而名山出龍貌恭體仁則鳳凰來儀騶虞傳云有至信之德則應之是與左

傳說同也說者又云人臣則修母致子應以昭二十九

年左傳云水官不修則龍不至故也人君則當方來應

是以駁異義云玄之聞也洪範五事一曰言於五行屬金孔子時周道衰於是作春秋以見志其言可從故天應以金獸之瑞是其義也箋公子信厚與禮相應有似於麟申述傳文亦以麟為信獸駁異義以為西方毛蟲更為別說于嗟歎辭此承上信厚歎信厚也故射義注云于嗟乎騶虞歎仁人也明此歎信厚可知

麟之定振振公姓傳定題也公姓公同姓于嗟麟兮音

義

反定都佞反字書作顛音同題徒兮

疏

傳正義曰定題反郭璞注爾雅顛也本作顛誤

謂顛也傳或作顛釋畜云的顛曰顛顛亦顛也故因此而誤定本作題公姓公同姓言同姓疎於同祖上云公

子為最親下云公族傳云公族公同祖則謂與公同高祖有廟屬之親此同姓則五服以外故大傳云五世祖

免殺同姓是也大傳注又云外高祖為庶姓是同高祖

為一節也此有公子公族公姓對例為然案杜云不

如我同父又曰不如我同姓傳曰同姓同祖此同姓同祖為異彼為一者以彼上云同父即云同姓同父之外次同祖更無異稱故為一也且皆對他人異姓不限遠近直舉祖父之同為親耳襄十二年左傳曰同姓於宗廟同宗於祖廟同族於禰廟又曰魯與諸姬臨於周廟謂同姓於文王為宗廟也邢凡蔣茅胙祭臨於周公之廟是同宗於祖廟也同族謂五服之內彼自以五服之外遠近為宗姓與此又異此皆君親非異國也要皆同姓以對異姓異姓最為疎也

麟之角振振公族傳麟角所以表其德也公族公同祖

也箋云麟角之末有肉示有武而不用於嗟麟兮音義

示有武一疏箋正義曰有角示有武有肉示不用有武本示作象疏而不用是其德也箋申說傳文也釋獸云

麟膚身牛尾一角京房易傳曰麟膚身牛尾馬蹄有五
彩腹下黃高丈二陸璣疏麟膚身牛尾馬足黃色員蹄
一角角端有肉音中鐘呂行中規矩遊必擇地詳而後
處不履生蟲不踐生草不羣居不侶行不入陷窞不罹
羅網王者至仁則出今并州界有麟大小如鹿非
瑞應麟也故司馬相如賦曰射麋脚麟謂此麟也

麟之趾三章章三句

周南之國十一篇三十六章百五十九句

毛詩注疏卷一

毛詩注疏卷一考證

周南序先王之所以教箋先王斥大王王季○蜀本石經王季下有文王二字

關雎章關關雎鳩傳然後可以風化天下○蜀本石經此句下多而正夫婦四字

左右芼之傳芼擇也○

臣照

按內則醴醢酒醴芼羹又

云雉兔皆有芼昏禮芼之以蘋藻又儀禮饋食皆有
鉶芼七發肥狗之和芼以椒蘇皆以菜雜肉為羹也

其以笔為擇者唯此處毛傳耳

箋后妃既得苻菜○蜀本石經作女欲得后妃既共
苻菜

關雎章句疏一字則言蹇而不會○臣照按顧炎武曰

緇衣之詩敝字一句還字一句若曰敝予還予則言
之不順矣是詩亦有一字句也

葛覃序箋而後言尊敬師傅者欲見其性亦自然○蜀
本石經後字作又字性字下有情字自然下有也字

薄汙我私傳汙煩也○蜀本石經作煩辱也

箋煩煩擱之○蜀本石經作煩擱之事也

卷耳章我姑酌彼金罍傳人君黃金罍○蜀本石經罍字上有為字

箋君賞功臣○君字各本俱誤作若字從蜀本石經改正

我姑酌彼兕觥箋飲酒禮自立司正之後○禮字上各本俱脫飲酒二字

臣宗楷

按立司正見鄉飲酒禮今

從蜀本石經增之

陟彼岵矣○岵說文作岵

云何吁矣○爾雅注作云何吁矣

樛木序箋后妃能和諧衆妾○蜀本石經后妃上多以
色曰妬以行曰忌八字

南有樛木箋木枝以下垂之故○蜀本石經無故字

又箋喻后妃能以恩意下逮衆妾○意字上各本俱

脫一恩字今從蜀本石經增

福履綏之箋妃妾以禮義相與和合○和字下監本脫
合字今從蜀本石經增

螽斯序言若螽斯不妬忌則子孫衆多也○歐陽修曰
序文顛倒宜作言不妬忌則子孫衆多若螽斯也許
謙曰但以言若螽斯句斷屬上文以不妬忌歸之后
妃而屬之下文意亦可通臣照按歐陽氏許氏之說
皆比舊說謂螽斯不妬忌者勝而許氏說尤長螽斯
之果否不妬忌固非人之所知而以不妬忌作推原

其本之辭更為明顯也

螽斯羽傳螽斯蚣蝑也○

臣祖庚

按爾雅云螽螽螽

螽蚣蝑詩緝云螽斯即螽螽子也非螽螽也毛誤以為蚣蝑孔氏因之遂合螽螽螽斯為一物

桃夭序箋疏宗子雖七十無無主婦○各本俱脫一無字今據禮記曾子問增正

免置章肅肅免置箋鄙賤之事○蜀本石經鄙賤上有行字

公侯干城箋有武力可任為將帥之德○蜀本石經無
力字

采芣序和平則婦人樂有君子矣○蜀本石經作天下
和平

薄言采之箋薄言我薄也○蜀本石經薄言下多一言
字

漢廣章不可休息傳䟽疑經休息之字作休思也○
臣

會汾
按韓詩外傳即作休思朱子亦從之蓋休求為

韻通首皆以思為語辭也

不可求思箋人無欲求犯禮者○蜀本石經無禮字

江之永矣○韓詩永作漾薛注曰漾長也說文作義義

並同

不可方思箋必有潛行乘汙之道○蜀本石經必有作

本有

又箋故不可也○蜀本石經作故不可渡也

翹翹錯薪傳翹翹薪貌○蜀本石經作薪長大之貌也

言刈其楚箋楚雜薪之中尤翹翹者○蜀本石經楚字下有在字翹翹上有高字

麟趾序箋有似麟應之時無以過也○蜀本石經作雖有麟應之時而無以過也

振振公姓傳公姓公同姓○臣光型按玉藻云子姓之

冠也喪大記云子姓立於西方子姓子孫也蓋子不可以父之字為姓孫則以王父之字為姓姓之所別自孫始故子姓即子孫朱傳以為公孫得之

毛詩注疏卷一考證